

# Ya hulat ni apostol Pablo kanlan ampaniwala kan Apo Jesu-Cristo ha Roma

*Paunan habi*

Hata inhulat ni apostol Pablo ay kanlan ampaniwala kan Apo Jesu-Cristo ha balayan Roma ta êmên la muwang ya labay na hilan hirawêñ, haka ta êmên la muwang ya pahawop ya kanla ha pamanlumagay na ha bansan Espana. An-ipamwang na kanla ya tungkol ha biyay ya ayn angga gawan ha paniwala kan Apo Jesu-Cristo, haka no ay-êmên dapat mamiyay hêñ mihay Cristiano hêñ allo-allo.

An-ipamwang na êt di, ya balang miha, Israelita man o alwa, ay makasalanan haka kailangan parusaan hêñ ayn angga. Noa, hilay ampaniwala kan Apo Jesu-Cristo, ay an-itad ni Apo Namalyari hêñ ayn kasalanan. Iligtas na hila ha parusa ya ayn angga, gawan bat ha ayn kapantag ya ingalo na, alwan gawan ha pamanhumonol la ha hinon kautuhan. An-ipamwang na êt di ya hilay an-itad ni Apo Namalyari hêñ ayn kasalanan, gawan ha paniwala la kan Apo Jesu-Cristo, ay magkamain pakikimiha kan Apo Jesu-Cristo.

An-ipamwang ni apostol Pablo ya kal-atan kanlan Israelita ay a naniwala kan Apo Jesu-Cristo, êmbayro man, ay a na hila pinaulayan ni Apo Namalyari hêñ anggan-angga. Ta iningalwan na ya alwan Israelita hêñ dinyanan hilan panaon,

ta êmêñ hila maniwala etaman. Lano mapakina-bangnan lan Israelita etaman ya ingalo na.

Kabooan hêñ laman hêñ hata hulat:  
Umpisan hulat 1:1-17

Makasalanan ya balang miha, haka kailangan  
hêñ iligtas ha parusa 1:18-3:20

No ay-êmêñ na kitamon an-iligtas ni Apo Namalyari 3:21-4:25

Ya bayoy biyay gawan ha dinyag ni Apo Jesu-Cristo ha ikakangêd tamo 5:1-8:39

Ya tinalagá ni Apo Namalyari para kanlan Israelita 9:1-11:36

Ya ugali hêñ Cristiano 12:1-15:13

Katganan habi 15:14-16:27

<sup>1</sup> Hiko hi Pablo, ya ampanulat, ya ampaghuyó kan Apo Jesu-Cristo. Pinili na ko ni Apo Namalyari hêñ mag-in apostol ni Apo Jesu-Cristo, hêñ mangitoro hêñ Mangêd ya Habi tungkol ha biyay ya ayn angga ya ubat kan Apo Namalyari.

<sup>2</sup> Habaytoy Mangêd ya Habi, ay mana nay nan impangako, ta impahulat na kanlan mâmipamwang hêñ an-ipaihip na kanla ha Banal ya Kahulatan na. <sup>3-4</sup> Habaytoy Mangêd ya Habi ay tungkol ha Anak na, ya Panginoon tamon Jesu-Cristo, ya nag-in tawo, hêñ hiyay in-anak ha kaapo-apoan ni Arin David. Napaptêgan ya panga-Diyos na hêñ hiyay biniyay oman gawan ha kapangyarihan hêñ Espiritu ni Apo Namalyari.

<sup>5</sup> Gawan kan Apo Jesu-Cristo, ay indin kangko ya ayn kapantag ya ingalo ni Apo Namalyari, haka ya tungkulán hêñ mag-in apostol, hêñ mangitoro ha balang bansa, ta êmêñ main alwan Israelita

ya mangipakarani hēn maniwala, haka humonol kana. <sup>6</sup> Haka hikaw bahēn ha balayan Roma, ay kalamo kaw bayro ha hinagyat ni Apo Namalyari hēn mag-in kan Panginoon Jesu-Cristo.

<sup>7</sup> Habaytsi ya hulat ko ay para kamoyun atsi bahēn ha balayan Roma ya anlugarēn ni Apo Namalyari ya pinili na hēn mag-in kana.

An-ihalangin kataw ya ingalwan na kaw ni Panginoon tamon Jesu-Cristo haka ni Apo Namalyari, ya Tatang tamo. Patékbékēn la dayi ya nakêm yo.

<sup>8</sup> Mu-muna, ay an-ipagpahalamat kataw kan Apo Namalyari, ta ya paniwala yo kan Apo Jesu-Cristo ay namwangan ha boon luta. Haka anggilamēn ni Apo Namalyari hata pagpahalamat ko gawan kan Apo Jesu-Cristo. <sup>9</sup> Muwang ni Apo Namalyari, ya ampaghuyuan ko hēn boon nakêm ha pangipamwang hēn Mangēd ya Habi tungkol ha Anak na, ya panay kataw hēn an-ilamo ha pamanalangin ko. <sup>10</sup> Nabuyot kinan an-ipanalangin haka ampakidoko kan Apo Namalyari, no kalabayen na, ay dyanan na kon panaon hēn makahiraw ako bahēn kamoyu. <sup>11</sup> Labay-labay kon maniraw kamoyu, ta labay kon itoro kamoyu ya intoro kangkon Espiritu ni Apo Namalyari, ta êmēn tumaniêh ya paniwala yo. <sup>12</sup> Ya labay kon habiêن, ay mapipapakhaw kitamon nakêm gawan ha paniwala tamo, ya paniwala yo haka ya paniwala ko.

<sup>13</sup> Patêl ha Panginoon, labay kon mamwangan yo, ya kata-ungno kinan labay maniraw bahêن, noa, panay hēn main ampakaabala kangko. Labay ko dayi hēn mapahanan hilay ampaniwala kan Apo Jesu-Cristo bahêن gawan ha panoro ko,

hêñ nanad ha nalyari kanlan kaatag ya logal lan alwan Israelita. <sup>14</sup> Main akon utang nakêm kan Apo Namalyari hêñ mangipamwang hêñ tungkol kan Apo Jesu-Cristo ha balang miha, kanlan tagabalyan o mag-in marayo ha balayan, kanlan main pinag-aralan o mag-in ayn pinag-aralan. <sup>15</sup> Kabay labay-labay kon ipamwang etaman bahêñ kamoyu ha balayan Roma, ya tungkol ha Mangêd ya Habi.

### *Ya kapangyarihan hêñ Mangêd ya Habi*

<sup>16</sup> A ko an-ikarêng-êy ya Mangêd ya Habi tungkol kan Apo Jesu-Cristo, ta habaytoy kapangyarihan ni Apo Namalyari ha ikaligtas hêñ kaganawan ya ampaniwala kan Apo Jesu-Cristo. Muna kanlan Israelita, bayo kanlan alwan Israelita. <sup>17</sup> Ta gawan ha Mangêd ya Habi, ay mamwangan tamo no ay-êmên na kitamon an-itad ni Apo Namalyari hêñ ayn kasalanan. Ya pinangubatan hêñ habayto ay yabay ya paniwala tamo kan Apo Jesu-Cristo. Ta nakahulat ha impahulat ni Apo Namalyari, ya êmên di, “Hilay an-itad ni Apo Namalyari hêñ ayn kasalanan, gawan ha paniwala la, ay dyanan hêñ biyay ya ayn angga.”\*

### *Makasalanan ya balang miha*

<sup>18</sup> Hi Apo Namalyari ya atsi ha langit, ay namipamwang hêñ huluk na kanlan ayn limo kana, haka kanlan ampanyag karawakan, ta ya karawakan la, ay ampakahabát ha paman-humwêñ hêñ kaptégan hêñ tungkol kana ha ihip la, <sup>19</sup> gawan malinaw nan impamwang kanla ni

---

\* **1:17** Habacuc 2:4.

Apo Namalyari ya mamwangan hēn tungkol kana.

<sup>20</sup> A ya man angkahēlēk hi Apo Namalyari, ay paubat hēn dinyag nay hata luta, ay angkahēlēk ha kaganawan dinyag na, ya panga-Diyos na haka kapangyarihan na ya ayn angga. Kabay a la māhabi ya ayn Diyos. <sup>21</sup> Ta agyan muwang la ya main Diyos, ay a la yan ansimbaēn o ampahalamatan man, yan bat hilan ampangihip hēn ayn kapukat-pukat, gawan binuwag ya kaihipan la ha kaptēgan. <sup>22</sup> Ampagmuwang-muwangan hila, noa, anlumtaw hilan ayn minuwang. <sup>23</sup> Ta kisa simbaēn la hi Apo Namalyari ya ayn ubatan haka ayn angga, yan ansimbaēn lay rebulto hēn tawo, haka ayop hēn nanad ha manok, baka, haka utan.

<sup>24</sup> Kabay pinaulayan hilay na ni Apo Namalyari ha hinon karawakan kalabayan lawini la. Taganán kapaparēng-êy ya andaygēn la ha lawini hēn miha ta miha. <sup>25</sup> Ta ya kaptēgan ya tungkol kan Apo Namalyari, ay hinagilyan lan alwan pêtēg, ta ya sinimba haka pinaghuyuan la, ay dinyag bat ni Apo Namalyari. A la sinimba haka pinaghuyuan hi Apo Namalyari ya nanyag hēn habayto. Hiya ya hépat hēn simbaēn hēn angga-angga! Amen.

<sup>26</sup> Kabay pinaulayan hilay na ni Apo Namalyari ha hinon karawakan kalabayan lawini, hēn nanad ha ampitakēh hēn parehon babayi, ya dapat bat ha lalaki haka babayi ya miahawa. <sup>27</sup> Haka êmbayro êt kanlan lalaki, tinalibatokan lay pamakitakēh ha babayi, ta maotoy hila ha kapareho lan lalaki. Kapaparēng-êy ya andaygēn la ha miha ta miha, haka antanggapēn lay nay parusa ya hépat ha pandaygēn la.

<sup>28</sup> Gawan a la anggalangêñ hi Apo Namalyari, ay pinaulayan na hilay na ha hinon karawakan kalabayan kaihipan la. Kabay andaygêñ lay nay alwan hépat hén daygêñ. <sup>29</sup> Antalanêñ hilan kaganawan alwan mangêd, karawakan, kapanalarêhan, haka karawakan kalabayan lawini. Panay hilan ampanyag karidyaan, pamatsin kapareho, pamanubuk, kalokwan, pamairap, pamandikaw, pamanyakaw, <sup>30</sup> pamaniran kapareho, panhumêmek kan Apo Namalyari, kamusmusan, kapagmahlayan, kalangkaan, kapanalanghangan ha toa, haka mapangihip hila hén kaatag pon ya karawakan ya madyag la. <sup>31</sup> Mapanyag hilan ayn kapukatan, alwa hilan mapaypaniwal-an, alwan mangêd ya nakêm la, haka alwa hilan maingaloêñ. <sup>32</sup> Agyan muwang lay na ya parusaan ni Apo Namalyari hén kamatsan ya hilay manyag êmbayro, ay daygêñ la pon êt, haka an-ikahigla la pon êt ya kapareho lan ampanyag hén êmbayro.

## 2

### *Makatoynungan ya pamanatol ni Apo Namalyari*

<sup>1</sup> Kayno an-ihipêñ yo ya dapat parusaan ya habaytoy mapanyag karawakan ya inungkat ko. Noa, kaillag kaw, ta ha pamanatol yo hén kapareho yo, ay anhabiêñ yoy dapat kaw hén parusaan, ta hikaw man, ay ampanyag hén karawakan, haka lano kiarap kaw kan Apo Namalyari ha Allon Pamanukom na. <sup>2</sup> Muwang tamina ya makatoynungan ya pamanatol ni

Apo Namalyari hên parusaan hilay mapanyag karawakan. <sup>3</sup> Noa, hikaw ya ampamintas kanlan mapanyag karawakan, êndat yon makatakah kaw ha parusa ni Apo Namalyari, ya hikaw man êt, ay ampanyag hên karawakan! <sup>4</sup> Kayno an-itad yon ayn pukat ya ayn kapantag ya pamangingalo, haka pamagtêeh ni Apo Namalyari kamoyu!

Yarin a yo muwang ya andyanan na kaw hên panaon hên maghêhê hên manalibokot ha pamanayag yon kasalanan! <sup>5</sup> Noa, ha kakdêyan ulo yo, hên a kaw ampaghêhê, ay ampabyatêh yoy parusa ni Apo Namalyari kamoyu lano no lumatêng ya Allon Pamanukom na ya makatoynungan, <sup>6</sup> ta tumbahan na ya balang miha ha dinyag la. <sup>7</sup> Mam-i yan biyay ya ayn angga kanlan ampagtêeh hên mag-in ikahigla na. <sup>8</sup> Noa, parusaan na hên ayn ingalo hilay makasarili, ya a ampanonol ha kaptêgan ya ubat kana, ta ampanyag hila tanan karawakan. <sup>9</sup> Hadyay kairapan ya maranasan lan balang mapanyag karawakan, haka mamalagêhbêg ya nakêm la, kapareho kon Israelita, o alwan Israelita. <sup>10</sup> Noa, hilay mapanyag kangêran, ay ingalwan na hên dyanan karangalan, dayêw haka kapatêkbêkan ha biyay ya ayn angga, kapareho kon Israelita man, o alwan Israelita. <sup>11</sup> Gawan hiyay ayn anggampian, ta pantag ya panlêk na ha balang miha.

<sup>12</sup> Hinoman ya nanyag kasalanan, ay idayo kan Apo Namalyari hên parusaan hên ayn angga. Hilay Israelita, ya nagmuwang hên Kautuhan ya indin ni Apo Namalyari kan apo Moises, ay parusaan, ta a la hinonol ya habayto. Hila etaman

ya alwan Israelita, ya ayn muwang hēn tungkol ha Kautuhan, ay a hila parusaan ha a la hinonol ya habayto, noa, parusaan hila ha pamanyag lan karawakan. <sup>13</sup> Hilay an-itad ni Apo Namalyari hēn ayn kasalanan, ay habaytoy mahonol ha Kautuhan, alwan hilay nakagilam haka a hinumonol. <sup>14</sup> Hila etaman ya alwan Israelita, ay ayn muwang hēn tungkol ha Kautuhan ya indin ni Apo Namalyari kan apo Moises. Embayro man, ay main kanla ya mapanyag kangēran, gawan ha nakēm la, ya nanad main kautuhan. <sup>15</sup> Ha pamanyag lan kangēran, ay nanad nakahulat ha nakēm la ya Kautuhan. Minghan an-ipapanêmtêm hēn kon-sinsya la kanla ya nakadyag hilan karawakan, minghan etaman, ay an-ipapanêmtêm na kanla ya nakadyag hilan kangēran. <sup>16</sup> A na liwaan ni Apo Namalyari ya habayto ha Allon Pamanukom, ustон ipalingon na kan Apo Jesu-Cristo, ya kaganawan dinyag lan balang miha anggan ya inlihim la. Habaytoy agpang ha Mangēd ya Habi ya an-ipamwang ko.

*Ya Israelita haka ya Kautuhan ya indin ni Apo Namalyari kan apo Moises*

<sup>17</sup> Hikaw ya kapareho kon Israelita, êndat yon madyanan kaw hēn biyay ya ayn angga, gawan ha pamanhumonol yo ha Kautuhan, haka an-ipaglambung yo ya muwang yo hi Apo Namalyari. <sup>18</sup> Muwang yo kano ya kalabayan na, haka no hinoy mangēd ya dapat daygēn, gawan pinagaralan yoy Kautuhan. <sup>19</sup> Êndat yon ampakaakay kaw kanlan nanad buwag ya kaihipan! Êndat yon nanad kaw hēn hawang ya ampamahawang

hêñ dann hêñ palako kan Apo Namalyari para kanlan nanad atsi ha kariglêman. <sup>20</sup> Èndat yon gawan atsi kamoyu ya Kautuhan, ay muwang yoy hinon kamwangan, haka èndat yon pêtêg ya hinon anhabiên yo. <sup>21</sup> Ampanoro kaw ha kaatag! Awta a yon an-honolêñ ya an-itoro yo! Ambawalêñ yo hilay manakaw, noa, ampanakaw kaw etaman! <sup>22</sup> Ambawalêñ yo hilan manakéh ha alwan ahawa, noa, ampamabayi haka ampakilalaki kaw etaman! Anhumêmêk kaw ha rebulto hêñ alwan pêtêg ya diyos, noa, anhumwêñ kaw hêñ manakaw bayro ha pagsimbaan kanla! <sup>23</sup> Anipaglambung yoy kangêran hêñ Kautuhan ya indin ni Apo Namalyari kan apo Moises, noa, anipakarêng-êy yo hi Apo Namalyari, ha a yon an-honolêñ ya habaytoy Kautuhan na! <sup>24</sup> Habaytoy inungkat ha impahulat ni Apo Namalyari ya êmêñ di, “Hilay alwan Israelita, ay ampammusmus kan Apo Namalyari gawan kamoyun Israelita.”\*

<sup>25</sup> Ya pamatuli kantamo ay kamwangan ya hikitamo ay pinili ni Apo Namalyari, noa, no a tamo anhonolêñ ya Kautuhan, ay ayn pukat ya pamatuli kantamo, ta nanad kitamo tana kanlan alwan Israelita, ya a tinuli. <sup>26</sup> Noa, hilay alwan Israelita, ya a tinuli, ya anhumonol ha Kautuhan, ay nanad mantêg tinuli, ta an-itad hila ni Apo Namalyari hêñ pinili na. <sup>27</sup> Haka hila ya maghabi hêñ dapat kaw parusaan ni Apo Namalyari, gawan atsi kamoyu ya Kautuhan, yan a yo anhonolêñ ya habayto. <sup>28</sup> Hilay an-itad ni Apo Namalyari hêñ pinili na hêñ mag-in kana, ay alwan hilay Israelita,

---

\* <sup>2:24</sup> Ezekiel 36:22.

ya tinuli. <sup>29</sup> Noa, ya an-itad ni Apo Namalyari hēn pinili na hēn mag-in kana, ay hilay binayo ya nakēm, ya nanad mantēg hēn tinuli, ya nalinisan hēn Espiritu ni Apo Namalyari. Malyarin a hila dayēwēn hēn kapareho la, noa, taganán dayēwēn hila ni Apo Namalyari.

### 3

<sup>1</sup> Kayno an-ihipêñ yoy êmêñ di, “No êmbayro awud, ay hinoy alagá hēn panga-Israelita tamo kanlan alwan Israelita? Hinoy makwa tamon Israelita ha pangatuli tamo?” <sup>2</sup> Habién ko etaman kamoyu ya taganán main alagá hēn panga-Israelita tamo haka ya pangatuli tamo, ta impatsiwala ha ninuno tamon Israelita ya habi ni Apo Namalyari. <sup>3</sup> Pêtêg ya main kapareho tamon Israelita ya alwan mahonol kan Apo Namalyari. Yarin a na tuparêñ ni Apo Namalyari ya impangako na, gawan main nag-in alwan mahonol kana! <sup>4</sup> Ahê! Malaram man ya balang miha, ay taganán alwan malaram hi Apo Namalyari! Ihipêñ yoy nakahulat, ya wana,

“Apo Namalyari, pêtêg ya hinon anhabién mo, haka panay kan ampanambut, no main ibara kamo.”\*

<sup>5</sup> Main pilosopo ya ampaghabi ya alwan makatoynungan hi Apo Namalyari ha pamarusa na kantamo, ta ya katoynungan na kano, ay angkahêlêk bat gawan ha karawakan tamo. <sup>6</sup> Taganán alwan pêtêg ya habayto! Ta no alwa yan makatoynungan hi Apo Namalyari ha pamarusa na kantamon Israelita, no manyag kitamon

---

\* <sup>3:4</sup> Awit 51:4.

karawakan, ay alwa yan makatoynungan ha pamarusa na ha alwan Israelita.

<sup>7</sup> Kayno main maghabi ya dapat a hila parusaan gawan makasalanan hila, ta ha kalokwan la, ay mahêlêk ya kaptêgan hên habi ni Apo Namalyari, haka hiyay puriên. <sup>8</sup> Hilay ampaghabin êmbayro, ay nanad lay nan anhabiên ya êmên di, “Hali, manyag kitamon karawakan, ta êmên ya mapuri hi Apo Namalyari!” Haka main ampamibara kangko, ya êmbayroy an-itoro ko! Hilay parusaan ni Apo Namalyari haka habaytoy hépat kanla.

*Pamaptêg ya ayn hinoman ya banal ha hêlêk ni Apo Namalyari*

<sup>9</sup> Yarin hikitamoy Israelita ay mangêd ha hêlêk ni Apo Namalyari kanlan alwan Israelita! Mana kinan intoro kamoyu ya balang miha ay antalanên hên kasalanan. <sup>10</sup> Gawan nakahulat ha habi ni Apo Namalyari, ya wanana hulat,

“Ayn tawo ya ayn kasalanan. Ayn taganán miha man ya ayn kasalanan.

<sup>11</sup> Ayn miha man ya main ustoy pamangintindi hên tungkol kan Apo Namalyari, haka ayn ampanapol kana.

<sup>12</sup> Ya balang miha, ay nagdayo kana. Naubuh hilan nag-in ayn pukat.

Ayn miha man ya mapanyag kangêran.”<sup>†</sup>

<sup>13</sup> “Ya pamaghabi la ay hadyay dawak, hên nanad ha nabata ya ubat ha pamilbêngan natsi ya inloat.

Panay kalokwan ya panhabiên la.”<sup>‡</sup>

---

<sup>†</sup> **3:12** Awit 14:1-3, 53:1-3.    <sup>‡</sup> **3:13** Awit 5:9.

“Mapanira ya panhabiên la, hêñ nanad utan ya makamatsi.”§

14 “Panay kapanuboyan haka kahêmêkan ya atsi ha bêbêy la.”\*

15 “Maparah hilan makamatsi hêñ kapareho la.

16 Antoman ya lakwên la, ay manira hila, haka main mag-in kapaingalo gawan kanla.

17 A hila taganán kamwang hêñ makilamo haka mag-in mapatékbék.”†

18 “Ayn hilan pamanggalang kan Apo Namalyari, gawan ayn hilan limo kana.”‡

19 Habaytoy nakahulat ha habi ni Apo Namalyari, ay para kantamon, Israelita, ya atsi ha aypa hêñ Kautuhan ni apo Moises, kabay malinaw ya ayn hinoman ya makapaghabi ya ayn yan kasalanan ha Allon Pamanukom ni Apo Namalyari, ta ya balang miha ha boon luta ay makasalanan, haka hêpat hêñ parusaan.  
 20 Ayn miha man ya an-itad ni Apo Namalyari hêñ ayn kasalanan gawan ha pamanhumonol ha Kautuhan, ta ayn taganán makahonol hêñ habayto. Noa, gawan ha Kautuhan, ay mamwangan no hino ya kasalanan haka mamwangan ya makasalanan ya balang miha.

*Ayn kitamon kasalanan ha hêlêk ni Apo Namalyari no ampaniwala kitamo ha dinyag ni Apo Jesu-Cristo ha ikakangêd tamo*

21 Noa, amêhêñ, ay impamwang kantamo, no ay-êmêñ na kitamon an-itad ni Apo Namalyari hêñ

---

§ 3:13 Awit 140:3.      \* 3:14 Awit 10:7.      † 3:17 Isaias 59:7-8.

‡ 3:18 Awit 36:1.

ayn kasalanan, haka habayto ay alwan ha pamanhumonol ha Kautuhan. Habaytoy inungkat ha inhulat ni apo Moises haka ha inhulat lan kaatag ya mampamwang hén an-ipaihip kanla ni Apo Namalyari. <sup>22</sup> Améhén, an-itad na kitamina hén ayn kasalanan, ya balang ampaniwala ha dinyag ni Apo Jesu-Cristo ha ikakangéd tamo, Israelita man o alwa. <sup>23</sup> Ta ya balang miha ay nakadyag hén kasalanan, haka main pamagkulang kan Apo Namalyari. <sup>24</sup> Émbayro man, ay améhén an-itad na kitamo ni Apo Namalyari hén ayn kasalanan, gawan ha ayn kapantag ya ingalo na, ya indigalo na kantamo, gawan ha daya ni Apo Jesu-Cristo, ya pinamayad ha parusa hén kasalanan tamo. <sup>25</sup> Hiyay in-utoh ni Apo Namalyari hén mag-in átang, ya pamayad hén kasalanan tamo. Haka gawan ha daya na, ay mapatawad ya kasalanan tamo no maniwala kitamo kana. In-utoh ni Apo Namalyari hi Apo Jesu-Cristo, ta êmén maipahlék ya main katoynungan ya mana nan dinyag hén bayo nan in-utoh hi Apo Jesu-Cristo, ta ha pamagtéêh na, ay a na pon pinarusaan ya tawo hén haton lagi ha pamanyag lan kasalanan, <sup>26</sup> noa, améhén ay impahlék na, ya a na naliwaan ya habaytoy kasalanan la hén hato, ta pinilamo nay na ha kasalanan ya binayaran ni Apo Jesu-Cristo. Kabay napaptégan ya andaygén na ay main katoynungan, haka an-itad na hén ayn kasalanan, ya hilay ampaniwala kan Apo Jesu-Cristo.

<sup>27</sup> Kabay a tamina maipaglambung, ya gawan ha pamanhumonol tamo ha Kautuhan, ay ayn kitaminan kasalanan! Ta an-itad na kitamina ni Apo Namalyari hén ayn kasalanan gawan ha

paniwala tamo kan Apo Jesu-Cristo. <sup>28</sup> Ta mali-naw ya hikitamoy an-itad ni Apo Namalyari hên ayn kasalanan, gawan ha paniwala tamo kan Apo Jesu-Cristo, haka alwan gawan ha paman-humonol ha Kautuhan. <sup>29</sup> Hikaw ya kapareho kon Israelita, kayno êndat yon hi Apo Namalyari ay Diyos tamon bat hên Israelita! Alwa! Hiyay Diyos hên alwan Israelita etaman! <sup>30</sup> Gawan ha mimihay Diyos, ay an-itad na kitamon Israelitay ayn kasalanan, gawan ha paniwala tamo kan Apo Jesu-Cristo, hên nanad êt kanlan alwan Israelita. <sup>31</sup> Noa, paan yon ihipêñ ya ayn nanan pukat ya Kautuhan gawan an-itad na kitamo ni Apo Namalyari hên ayn kasalanan, gawan ha paniwala tamo ha dinyag ni Apo Jesu-Cristo, ta no ampaniwala kitamina kan Apo Jesu-Cristo, ay lalo tamon mahonol ya Kautuhan.

## 4

*Hi Apo Abraham ay intad ni Apo Namalyari hên ayn kasalanan  
(Galacia 3:6-9)*

<sup>1</sup> Ihipêñ tamo hi apo Abraham ya ninuno naêñ Israelita. Awta hiyay intad hên ayn kasalanan ni Apo Namalyari? <sup>2</sup> No hiyay intad hên ayn kasalanan gawan ha dinyag na, ay main ya dayin maipaglambung. Noa, ha kaptêgan, ayn yan maipaglambung ha arapan ni Apo Namalyari. <sup>3</sup> Habaytsi ya impahulat ni Apo Namalyari ya tungkol kana ha Kahulatan, “Naniwala hi Abraham ha hinabi ni Apo Namalyari, kabay hiyay in-

tad ni Apo Namalyari hēn ayn kasalanan.”\* <sup>4</sup> Hilay ampakiobra ay ampananggap hēn upa, alwan digalo, ta habayto ay pinaghayngētan la. <sup>5</sup> Noa, an-itad ni Apo Namalyari ya hilay makasalanan hēn ayn kasalanan, hēn alwan gawan ha pamaghayngēt la, noa, gawan ha paniwala la kana. <sup>6</sup> Hēn hato, ay wani Arin David ya iningalwan hilay an-itad ni Apo Namalyari hēn ayn kasalanan, hēn alwan gawan ha dinyag la, noa, gawan ha paniwala la.

<sup>7</sup> “Iningalwan hilay pinatawad ni Apo Namalyari ha kasalanan la, ta inalih nay na kanla.

<sup>8</sup> Iningalwan hilay an-itad ni Apo Namalyari hēn ayn kasalanan.”†

<sup>9</sup> Yarin kannaēn bat Israelita ya tinuli, ya habaytoy pangingalo ni Apo Namalyari! Alwa! Ta habayto ay para etaman kanlan alwan Israelita a hila man tinuli. Ihipēn tamon oman ya impahulat ni Apo Namalyari, ya tungkol kan apo Abraham, ya naniwala ha hinabi ni Apo Namalyari, kabay intad ya ni Apo Namalyari hēn ayn kasalanan.

<sup>10</sup> Nakano yan intad ni Apo Namalyari hēn ayn kasalanan hi apo Abraham, bayo ya tinuli, o pangayari? Hi apo Abraham ay intad ni Apo Namalyari hēn ayn kasalanan hēn bayo ya tinuli, ya labay habiēn hēn bayo ya nag-in Israelita. <sup>11</sup> Tinuli ya ha pamaptēg ya hiyay intad ni Apo Namalyari hēn ayn kasalanan gawan ha paniwala na. Kabay hiyay nag-in nanad ninuno lan ampaniwala kan Apo Namalyari, ya an-itad ni Apo Namalyari hēn ayn kasalanan, agyan a hila tinuli, ya labay habiēn

---

\* **4:3** Genesis 15:6    † **4:8** Awit 32:1-2.

agyan alwa hilan Israelita. <sup>12</sup> Hiya etaman ya ninuno naêñ Israelita ya tinuli, ya ampaniwala ha impangako ni Apo Namalyari hên nanad ha paniwala ni Abraham hên bayo ya tinuli, ya pala-tandaan ya ampaniwala ya kan Apo Namalyari.

*Ya impangako ni Apo Namalyari kan apo Abraham*

<sup>13</sup> Hêñ haton lagi, ay impangako ni Apo Namalyari kan apo Abraham haka kanlan mag-in kaapo-apoan na, ya ingalwan na hilay tawo ha balang bansa.<sup>‡</sup> Habayto ay alwan gawan ha pamanhumonol ni apo Abraham ha Kautuhan, noa, gawan ha paniwala na kan Apo Namalyari. Gawan habaytoy paniwala na, ay hiyay intad ni Apo Namalyari hêñ ayn kasalanan. <sup>14</sup> Ta no alimbawa, ta hilay anhumonol ha Kautuhan, ay dyanan hêñ impangako ni Apo Namalyari, ay ayn kapukatan ya paniwala, haka ya impangako. <sup>15</sup> Ta ya Kautuhan ay main kalamoy parusa. Gawan no main Kautuhan, ay main humalanghang.

<sup>16</sup> Kabay ya pangako ay matupad bat kanlan ampaniwala kan Apo Namalyari, ta êmêñ na maidigalo ya habayto gawan ha ayn kapantag ya ingalo na kanlan balang miha ya main paniwala nanad kan apo Abraham, alwan bat kanlan kapareho kon Israelita, ya dinyanan Kautuhan. Gawan hi apo Abraham ay nanad ninuno hêñ balang miha ya ampaniwala kan Apo Namalyari. <sup>17</sup> Gawan habaytsi ya impahulat ni Apo Namalyari ya tungkol kan apo Abraham, “Pinili kata hêñ mag-in ninuno hêñ kal-atan bansa.”<sup>§</sup> Matupad

---

<sup>‡</sup> **4:13** Genesis 12:3b, 18:18 haka 22:18.    <sup>§</sup> **4:17** Genesis 17:5.

ya habayto, ta ya nangako, ya pinaniwal-an ni apo Abraham, ay hi Apo Namalyari, ya nanyag hēn boon luta ha utoh nan bēngat, haka main kapangyarihan hēn biyayēn ya natsi. <sup>18</sup> Agyan ayn ana ha ihip ni apo Abraham, ya magkaanak ya kan Sara, ta mantēg hilay nan toa ya miahawa, ay naniwala ya, ya hiyay mag-in ninuno hēn kal-atan bansa, hēn nanad ha hinabi ni Apo Namalyari kana, ya wana, “Ya mag-in kaapo-apoan mo ay a makwan mabilang, hēn nanad ha bêtêwēn ya a makwan mabilang.”\* <sup>19</sup> Agyan mantēg yay nan toa ta mag-magatoh ya taon na, haka layuh ya hi Sara, ya ahawa na, ay a naalíh ya paniwala na. <sup>20</sup> A ya nag-alangan ha pangako kana ni Apo Namalyari, noa, tinumaniēh ya paniwala na ha pamagsimba na kan Apo Namalyari. <sup>21</sup> Booy nakêm nan naniwala, ya agyu ni Apo Namalyari hēn tuparēn ya impangako kana. <sup>22</sup> Gawan ha paniwala na, ay hiyay intad ni Apo Namalyari hēn ayn kasalanan. <sup>23</sup> Hata habi, ya “Hiyay intad ni Apo Namalyari hēn ayn kasalanan,”† ay alwan bat para kan apo Abraham, <sup>24</sup> noa, habayto ay para kantamo etaman. Ta hikitamoy ampaniwala kan Apo Namalyari, ya namabiyay oman kan Panginoon tamon Jesu-Cristo, ay itad etaman hēn ayn kasalanan. <sup>25</sup> Hi Panginoon Jesu-Cristo ay in-utoh ni Apo Namalyari hēn matsi gawan ha kasalanan tamo, haka hiyay biniyay oman, ta êmēn hikitamo ay itad ni Apo Namalyari hēn ayn kasalanan.

## 5

---

\* **4:18** Genesis 15:5. † **4:23** Genesis 15:6.

*Hi Panginoon tamon Jesu-Cristo, ya pinangubatan hēn pamakiúmang tamo kan Apo Namalyari*

<sup>1</sup> Gawan ha paniwala tamo kan Panginoon tamon Jesu-Cristo, ay an-itad kitamina ni Apo Namalyari hēn ayn kasalanan, haka gawan ha pangamatsi ni Panginoon tamon Jesu-Cristo, ay niúmang kitamina kan Apo Namalyari. <sup>2</sup> Gawan ha paniwala tamo kan Panginoon tamon Jesu-Cristo, ay angkatanggap tamina ya ayn kapan>tag ya ingalo ni Apo Namalyari. Haka haday kahiglaan tamo, ta angkasigurado tamo ya lano, ay makapakilamo kitamo kana ha langit. <sup>3</sup> Alwan bēngat habayto, noa, an-ikahigla tamo êt ya kairapan, haka pamanubuk ya angkaranasan tamo, gawan habaytoy ampakapitoro kantamo hēn mag-in mapagtêeh. <sup>4</sup> Haka ya pamagtêeh tamo, ay ampakapahigla kan Apo Namalyari, kabay angkasigurado tamo ya lano, ay makalamo tamo ya ha langit nanad ha impangako na. <sup>5</sup> Haka a maglungkot ya ihip tamo, ta angkasigurado tamo ya lano, ay tuparêni Apo Namalyari ya habaytoy impangako na, gawan pinaptêgan nay haday pamanlugud na kantamo, ya angkatanam tamo gawan ha Espiritu na ya indigalo na kantamo.

<sup>6</sup> Ta hēn nilumatêng ya panaon ya intakda ni Apo Namalyari, ay natsi ya hi Apo Jesu-Cristo ha ikakangêd tamon makasalanan, ya a makapiligtas hēn sarili ha parusa. <sup>7</sup> Kantamon tawo, ay bihiran main matsi para ha mihay kapareho tamo ya mahonol ha Kautuhan ni Apo Namalyari, êmbayro man, ay malyarin main maghêkaw nakêm, hēn matsi para ha mihay maingaloén, ya mapanyag

kangēran. <sup>8</sup> Noa, hi Apo Namalyari etaman, ay pinaptēgan nay pamanlugud na kantamo, ta hēn haton makasalanan kitamo pon, ay in-utoh na hi Apo Jesu-Cristo hēn matsi ha ikakangēd tamo.

<sup>9</sup> Amēhēn, ta an-itad na kitamina ni Apo Namalyari hēn ayn kasalanan, gawan ha daya ni Apo Jesu-Cristo ha pangamatsi na, ay taganán iligtas na kitamo ni Apo Jesu-Cristo ha haday pamarusa ni Apo Namalyari lano ha Allon Panmanukom na. <sup>10</sup> Hēn hato, ay hikitamoy kapatsi ni Apo Namalyari, noa, amēhēn ay niúmang kitamina kana, gawan ha pangamatsi hēn Anak na, kabay angkasigurado tamo ya ligtas kitamina ha parusa, gawan kanan Anak na hi Panginoon Jesu-Cristo, ya angkabiyay ha langit hēn ampanawop kantamo. <sup>11</sup> Alwan bat habayto, noa, amēhēn hi Apo Namalyari ya simbaēn haka an-ikahigla tamo, gawan kan Panginoon tamon Jesu-Cristo, ya pinangubatan hēn pamakiúmang tamo kan Apo Namalyari.

*Gawan kan Adan, ay nagkamain kasalanan, haka gawan kan Apo Jesu-Cristo, ay nagkamain kaligtasan*

<sup>12</sup> Ya pinangumpisaan hēn pamanyag kasalanan hēn balang miha bayri ha luta, ay hi Adan, haka gawan ha kasalanan na, ay hiyay natsi. Kabay paubat hēn habayto, ay maubuh kitaminan matsi, gawan kaganawan tamo ay nakadyag kasalanan. <sup>13</sup> Bayo nan indin ni Apo Namalyari ya Kautuhan kan apo Moises, ay makasalanan hilay nay tawo. Noa, ya pamanyag lan kasalanan, ay alwan halanghang kanlan

habaytoy Kautuhan, gawan ayn pon ya habaytoy Kautuhan hēn hato. <sup>14</sup> Embayro man, ay muwang tamo ya paubat hēn panaon ni Adan angga ha panaon ni apo Moises, ay kamatsan ya nagi-in tagēy hēn pamanyag kasalanan, agyan ya kasalanan la ay alwan êmén nanad ha kasalanan ni Adan ya a nanonol ha utoh ni Apo Namalyari.

Main pareho kan Adan haka kan Apo Jesu-Cristo, yabay ya pangadamay hēn kal-atan gawan kanla. <sup>15</sup> Noa, taganán alwan magkapareho ya imbalag la ha kal-atan. Pêtêg ya nagkamain hēn kamatsan ya balang tawo, gawan ha kasalanan nan mihay tawo, ya hi Adan, noa, taganán makapangyarihan ya indigalo ni Apo Namalyari ha kal-atan gawan ha ingalo na, ya indigalo na gawan ha ayn kapantag ya ingalo hēn mihay tawo, ya hi Apo Jesu-Cristo. <sup>16</sup> Mas makapangyarihan ya ayn kapantag ya ingalo, ya indigalo ni Apo Namalyari, kanan kasalanan ni Adan. Gawan ha kasalanan ni Adan, ay mananggap hēn kamatsan ya balang miha. Noa, gawan ha ayn kapantag ya ingalo ni Apo Namalyari, ay mapatawad, haka maitad hēn ayn kasalanan ya balang miha. <sup>17</sup> Gawan ha kasalanan nan mihay tawo, ya hi Adan, ay nanambut ya kamatsan, kabay nagkamain hēn kamatsan ya balang tawo. Noa, taganán makapangyarihan ya dinyag nan mihay tawo, ya hi Apo Jesu-Cristo, ta gawan kana, ay maubuh hēn madyanan biyay ya ayn angga, hēn mamaala hēn kalamo na, ya hilay intad ni Apo Namalyari hēn ayn kasalanan, ya pinaigan na hēn ayn kapantag ya ingalo na.

<sup>18</sup> Kabay, no ay-êmén mananggap hēn kamatsan ya balang miha, gawan ha unan kasalanan ni

Adan, ay êmbayro êt, gawan ha kamatsan ni Apo Jesu-Cristo, ya ayn kasalanan, ay maitad ni Apo Namalyari ya balang miha hên ayn kasalanan, ta êmén hila madyanan hên biyay ya ayn angga. <sup>19</sup> Gawan ha pamanalanghang ni Adan, kan Apo Namalyari, ay mal-at ya nag-in makasalanan, noa, ha pamanhumonol ni Apo Jesu-Cristo kan Apo Namalyari, ay mal-at ya itad ni Apo Namalyari hên ayn kasalanan.

<sup>20</sup> Hêñ indin ni Apo Namalyari ya Kautuhan na, ay namwangan lan tawo ya mal-at awud ya kasalanan la. Noa, nilum-at man ya pamanyag kasalanan, ay lalon nilum-at ya ingalo na. <sup>21</sup> Kabay no ay-êmén ya kamatsan ay nag-in tagêy hên pamanyag kasalanan, ay amêhêñ, gawan antitad na kitamina na hên ayn kasalanan, ay am-pamaala ya ayn kapantag ya ingalo na, ta êmén kitamo madyanan biyay ya ayn angga, gawan kan Panginoon tamon Jesu-Cristo.

## 6

### *Ya pakikimiha tamo kan Apo Jesu-Cristo*

<sup>1</sup> Hino awud ya mahabi tamo? Maghundo kitamo hên manyag kasalanan, ta êmén mapahahanan ya ayn kapantag ya ingalo ni Apo Namalyari kan-tamo? <sup>2</sup> Paan! Ta hikitamo ay nanad natsi ya ahina ampakadyag kasalanan. Kabay paan taminan ihundo ya pamanyag kasalanan. <sup>3</sup> Yarin a yo muwang ya hên binawtismoan kitamo, ay nagkamain kitamon pakikimiha kan Apo Jesu-Cristo, haka nanad kalamo kitamo ha kamatsan na! <sup>4</sup> Kabay nanad kitamo hên kalamo na hên natsi

haka in-ilbêng hên hikitamo ay binawtismoan, ta êmén kitamo magkamain hên bayoy pamimiyay hên nanad ha pamamiyay oman kan Apo Jesu-Cristo, gawan ha ayn kapantag ya kapangyarihan ni Apo Namalyari, ya Tatang tamo.

<sup>5</sup> Ta no inlamo kitamo kan Apo Jesu-Cristo ha kamatsan na hên indayo ha manan pamimiyay tamo, ay taganán inlamo kitamo ha pangabiyay nan oman hên nadyanan kitamo hên bayoy pamimiyay. <sup>6</sup> Ta muwang tamo ya nakalamo kan Apo Jesu-Cristo hên impako ha koros ya manan pangatawo tamo, haka ya kalabayan tamo hên manyag kasalanan, ta êmén a kitamina talanén hên kasalanan. <sup>7</sup> Gawan hilay natsi, ay ahinan antalanén hên kasalanan. <sup>8</sup> Haka no nakalamo kitamo ha pangamatsi ni Apo Jesu-Cristo, ay ampaniwala kitamo ya angkabiyay kitamina para maghuyo kan Apo Namalyari gawan ha pakikimiha tamo kan Apo Jesu-Cristo. <sup>9</sup> Muwang tamo ya nangoman yan nabiyay hi Apo Jesu-Cristo, haka a yay na mangoman matsu. Ayn nanan kapangyarihan kana ya kamatsan. <sup>10</sup> Ya pangamatsi na ay minghan bat hên para ha kasalanan tamo. Ya pangabiyay na, ay ta êmén ya maghuyo kan Apo Namalyari. <sup>11</sup> Kabay dapat tamon itad ya sarili tamo hên nanad natsi, ya ahina ampakadyag kasalanan, ta angkabiyay kitamina para maghuyo kan Apo Namalyari gawan ha pakikimiha tamo kan Apo Jesu-Cristo.

<sup>12</sup> Kabay paan taminan ipatalan ya sarili tamo ha kasalanan, ta êmén a kitamo manyag karawakan kalabayan lawini. <sup>13</sup> Paan paulayan hên manyag kasalanan ya hinon atsi ha boon

lawini tamo. Noa, iubuh tamon idin ya boon lawini tamo kan Apo Namalyari êmên manyag kangêran, ta habaytoy hépat kantamo, ya nanad natsi, ya dinyanan nan bayoy biyay. <sup>14</sup> Gawan ahina dapat manalan kantamo ya kasalanan, ta ayn kitamina ha aypa hên Kautuhan, noa, ya kaligtasan tamo ay gawan ha ayn kapantag ya ingalo ni Apo Namalyari.

*Dapat iubuh ya boon lawini haka nakêm ha pamanyag kangêran*

<sup>15</sup> Ay-êmên? Yarin manyag kitamon kasalanan gawan ayn kitamina ha aypan Kautuhan, ta ya kaligtasan tamo ay gawan ha ayn kapantag ya ingalo ni Apo Namalyari! Ahê! <sup>16</sup> Yarin a yo muwang no paipoh kaw, ay ipoh kaw hên anhonolên yo! No anhonolên yoy kasalanan, ay matsi kaw hên midayo kan Apo Namalyari, hên parusaan hên ayn angga. Noa, no mahonol kaw kan Apo Namalyari, ay mag-in mangêd ya pamimiyay yo. <sup>17</sup> Noa, halamat kan Apo Namalyari, ta hikaw ya manan ipoh hên kasalanan, ay boon nakêm hên ampanonol ha kaptégan ya intoro kamoyu. <sup>18</sup> Imbuhan na kaw ni Apo Namalyari ha aypa hên kasalanan, kabay mahonol kaw na kana ha paghuyo yo kana. <sup>19</sup> Paalimbawa ya toro ko, ta êmên yo tampol maintindihan gawan alwa pon nananiêh ya paniwala yo. Hêñ hato, ay impaipoh yoy sarili yo ha pamanyag hên karêmêkan, haka ya hinon karawakan. Noa, amêhêñ ay dapat yon iubuh ya boon lawini haka nakêm yo ha pamhumonol kana, ta êmên mag-in mangêd ya pamimiyay yo hêñ marayo ha karawakan.

<sup>20</sup> Hêñ haton ipoh kaw hêñ kasalanan ay ayn kaw muwang ya tungkol ha mag-in mahonol kana. <sup>21</sup> Yarin ikakangêd yo ya mana yon dinyag ya an-ikarêng-êy yo amêhêñ! Hilay ampanyag hêñ êmbayro ay matsi, hêñ midayo kan Apo Namalyari, hêñ parusaan hêñ ayn angga. <sup>22</sup> Noa, amêhêñ ta alwa kaw nan ipoh hêñ kasalanan, ta ampaghuyyo kaw na kan Apo Namalyari, ay am-pamiyay kaw hêñ pamanhumonol ha kalabayan na, haka madyanan kaw hêñ biyay ya ayn angga. <sup>23</sup> Gawan hêpat ha kasalanan ya kamatsan, ya main parusa ya ayn angga, noa, biyay ya ayn angga, ay an-idigalo ni Apo Namalyari, gawan ha pakikimiha tamo kan Panginoon tamon Jesu-Cristo.

## 7

*Ayn kitamina ha aypa hêñ Kautuhan*

<sup>1</sup> Hikaw ya patêl ko ha Panginoon, muwang ko ya maintindihan yoy humonol ya alimbawa, ya tungkol ha patakaran hêñ gobyerno, ta muwang yo ya kaban angkabiyyay kitamo, ay atsi kitamo ha aypa hêñ habaytoy patakaran. Noa, no matsi kitamo, ay ayn kitamina ha aypa hêñ habayto. <sup>2</sup> Alimbawa, wanana patakaran ya mihay babayi ya main ahawa, ay dapat makilamo ha ahawa na, kaban angkabiyyay ya pon. Noa, no matsi ya ahawa na, ay ayn yay na ha aypa hêñ patakaran hêñ tungkol ha miahawa. <sup>3</sup> Ha maparah ya habi, no makiahawa yan oman kaban nabiyyay ya ahawa na, ay wanana patakaran ya ampakilalaki ya. Noa, no matsi ya ahawa na, ay ayn yay na ha aypa hêñ

patakaran hēn tungkol ha miahawa, haka a ya ampakilalaki no makiahawa yan oman.

<sup>4</sup> Patêl ko ha Panginoon, êmbayro êt etaman, ay nanad natsi kitamina ha kapangyarihan hēn Kautuhan hēn natsi kitamo hēn inlamo ha pangamatsi ni Apo Jesu-Cristo ha koros, ta êmén kitamo makalamo kana ha pangabiyay nan oman, hēn maghuyo kan Apo Namalyari. <sup>5</sup> Hēn haton anhonolên tamo pon ya kalabayan hēn lawini tamo hēn manyag kasalanan, ay napahanan ya karawakan kalabayan lawini tamo hēn namwangan tamoy Kautuhan. Haka ya pamanyag tamon habayto, ay namidayo kantamo kan Apo Namalyari hēn parusaan hēn ayn angga. <sup>6</sup> Noa, amêhēn, gawan nakalamo kitamina ha kamatsan ni Apo Jesu-Cristo, ay ayn kitamina ha aypa hēn habaytoy Kautuhan. Kabay mahiglay nay pamaghuyo tamo kan Apo Namalyari, gawan ha bayoy pamimiyay tamo ha pamanawop hēn Espiritu na, alwan nanad hēn haton napilitan kitamo hēn humonol ha Kautuhan.

### *Gawan ha Kautuhan ay mamwangan tamo no hinoy kasalanan*

<sup>7</sup> Èndat lan kaatag ya Kautuhan ay pinangubatan hēn kasalanan. Noa, hēn ayn pon Kautuhan, ay main nanan kasalanan. No ayn Kautuhan, ay a ko dayi namwangan ya kasalanan awud ya andaygêñ ko. Ta alimbawa, no ayn utoh ya bawal hēn mag-in maridya, ay a ko dayin muwang ya kasalanan ya habayto. <sup>8</sup> Mana kinan makasalanan kabay hēn namwangan ko ya bawal awud ha Kautuhan ya mag-in maridya, ay

pinukaw hên kasalanan ya atsi kangko, ya kalabayan kon manyag hên hinon karidyaan. Ta no ayn Kautuhan, ay a tamo mamwangan ya ampanyag kitamon kasalanan. <sup>9</sup> Nahawang ya ihip ko hên hato hên a ko angkaintindihan ya laman hên Kautuhan. Noa, hên naintindihan kina, ay bigla kon namwangan ya ampanyag ako awud hên kasalanan. <sup>10</sup> Bayro kon namwangan ya nidayo ko awud kan Apo Namalyari. Ya Kautuhan ay indin ta êmén itoro ya dann ya palako ha biyay ya ayn angga. Noa, gawan a ko hinumonol ha Kautuhan, ay migtan ako dayi ha kamatsan hên midayo kan Apo Namalyari, hên parusaan hên ayn angga. <sup>11</sup> Ya kalabayan kon manyag kasalanan ay nanloko kangko, ta êndat ko ya magkamain akon biyay ya ayn angga ha pamanhumonol ko ha Kautuhan. Noa, ha kaptégan, ay a ko awud anhumonol ha Kautuhan, kabay nidayo ko kan Apo Namalyari hên parusaan hên ayn angga.

<sup>12</sup> Kabay, banal ya Kautuhan, haka ya balang utoh ay usto haka mangêd ta ubat hila kan Apo Namalyari. <sup>13</sup> Kayno êndat lan kaatag ya Kautuhan ya namigtan dayi kangko ha kamatsan, hên nidayo kan Apo Namalyari. Taganán alwan Kautuhan ya namigtan dayi kangko ha kamatsan hên nidayo kan Apo Namalyari, hên parusaan hên ayn angga. Noa, gawan ha kasalanan, ay nagêtan ako dayi ha kamatsan, gawan ha a ko hinumonol ha Kautuhan. Tinalagá ni Apo Namalyari ya main Kautuhan, ta êmén mapaptégan no ay-êmén karawak ya kasalanan.

*A tamo madyag ya kahampatan ya labay tamon*

*daygēn*

<sup>14</sup> Muwang tamo ya mangêd ya Kautuhan gawan ubat hila ha Espiritu ni Apo Namalyari. Noa, hiko etaman, ay tawo kon bêngat ya makasalanan. Nanad akon inhaliw hên nag-in ipoh hên kasalanan. <sup>15</sup> A ko angkaintindihan ya sarili ko. Ta a ko madyag ya labay kon daygêñ. Ta hatoy a ko labay daygêñ, ay habayto ya andaygêñ ko. <sup>16</sup> Kabay ha a ko labay hên manyag hên karawakan ya andaygêñ ko, ay habaytoy ampamaptêg ya an-uyunêñ ko ya mangêd ya habaytoy Kautuhan. <sup>17</sup> Kabay alwan hiko ya ampanyag hên habaytoy karawakan gawan ha kalabayan ko, noa, gawan ha nangarawak ya kalabayan hên lawini ko hên manyag kasalanan. <sup>18</sup> Gawan muwang ko ya ayn pêrad man kangêran ya ubat ha kalabayan lawini ko hên manyag kasalanan, ta agyan labay kon manyag kangêran, ay a ko madyag ya habayto. <sup>19</sup> Ta a ko ampanyag hên kangêran ya labay kon daygêñ, haka ya karawakan ya a ko labay daygêñ, ay habayto ya andaygêñ ko. <sup>20</sup> No ihundo koy pamanyag hên a ko labay, ay alwan gawan ha kalabayan ko ya hikoy ampanyag hên habaytoy karawakan, noa, gawan ha kalabayan hên lawini ko hên manyag kasalanan.

<sup>21</sup> Kabay angkaêtpanan ko ha sarili ko, ya agyan labay kon manyag kangêran, maparah akon manyag karawakan. <sup>22</sup> Boon nakêm haka ihip ko, ay anlugurêñ koy Kautuhan ni Apo Namalyari, <sup>23</sup> noa, muwang kina ya kaatag ya ampa-maalha lawini ko. Yabay ya kasalanan, haka habaytoy kasalanan ay ampanalanghang ha Kau-

tuhan ni Apo Namalyari ya labay kon honolên, kabay ampakadyag akon kasalanan, haka hikoy antalanêñ hêñ kasalanan. <sup>24-25</sup> Kapapaingalo kon taganá! Habaytsi ya angkalyari kangko. Boon nakêm ko ay labay kon humonol ha Kautuhan ni Apo Namalyari, noa, ya lawini ko ay antalanêñ hêñ kasalanan. Hinoy makapiligtas kangko ha kalabayan lawini ko hêñ manyag kasalanan, ya ampamigtan kangko ha kamatsan, hêñ midayo kan Apo Namalyari, hêñ parusaan hêñ ayn angga?

Halamat kan Apo Namalyari ta gawan ha dinyag ni Panginoon tamon Jesu-Cristo, ay manambut kitamo!

## 8

### *Ya pamimiay lan ampaakay ha Espiritu ni Apo Namalyari*

<sup>1</sup> Hikitamoy main pakikimiha kan Apo Jesu-Cristo, ay taganán ahinan lingonêñ hêñ parusaan para ha kasalanan tamo. <sup>2</sup> Gawan dinyanan kitamon bayoy biyay ya indigalo hêñ Espiritu ni Apo Namalyari, haka gawan ha pamamaala na ha biyay tamo, ay ayn kitamina ha aypa hêñ kapangyarihan hêñ kasalanan tamo, ya mamigtan dayi kantamo ha kamatsan, hêñ midayo kan Apo Namalyari, hêñ parusaan hêñ ayn angga. <sup>3</sup> Ya Kautuhan ay a makapialíh kantamo ha lokop hêñ kapangyarihan hêñ kasalanan tamo, gawan tawo kitamon bat ya a ampakahonol ha Kautuhan. Noa, dinyag ni Apo Namalyari ya a madyag hêñ Kautuhan. In-utoh nay kamiha-mihaan nan Anak ya nag-in tawo, ta êmén hiyay parusaan para ha kasalanan tamo. Ha êmbayro ay inalih ni Apo

Namalyari ya kapangyarihan hên kasalanan, ya nanalan ha lawini tamo. <sup>4</sup> Dinyag ni Apo Namalyari ya habayto, ta êmén hikitamo ya ampaakay ha Espiritu na, haka a anhumonol ha kalabayan hên lawini tamo hên manyag kasalanan, ay main kapangyarihan hên manonol ha Kautuhan.

<sup>5-6</sup> Ta hilay mapanyag kalabayan lan lawini la hên manyag kasalanan, ay bayron bat nakapéptêng ya kaihipan la, kabay migtan hila ha kamatsan hên midayo kan Apo Namalyari, hên parusaan hên ayn angga. Noa, hilay mapanyag kalabayan hên Espiritu ni Apo Namalyari, ay nakapéptêng ya kaihipan la kana, kabay magin mapatékbék ya kaihipan la, haka madyanan hilan biyay ya ayn angga. <sup>7</sup> Gawan hilay nakapéptêng ya kaihipan ha kalabayan lawini la hên manyag kasalanan, ay anhumalanghang kan Apo Namalyari. A la anhonolên ya Kautuhan ni Apo Namalyari, ta ha kaptêgan, ay a la mahonol ya habayto. <sup>8</sup> Hilay anhumonol ha kalabayan lan lawini la hên manyag kasalanan, ay a ampakapahigla kan Apo Namalyari.

<sup>9</sup> Noa, hikaw etaman, ay ampaidi kamoyu ya Espiritu ni Apo Namalyari, haka hiyay nay anhonolên yo, alway nan kalabayan lawini yo hên manyag kasalanan. Pakaihipên yo, ya hilay a ampaidyanan hên Espiritu ni Apo Namalyari, ay alwa pon kan Apo Jesu-Cristo. <sup>10</sup> Noa, no ampaidi ya kamoyu hi Apo Jesu-Cristo, matsu man ya lawini yo, gawan ha kasalanan, ay mabiay ya espiritu yo ha langit gawan intad na kaw ni Apo Namalyari hên ayn kasalanan. <sup>11</sup> Miha pon, ya Espiritu ni Apo

Namalyari, ay namabiyay oman kan Apo Jesu-Cristo, kabay no ampaidi ya kamoyu ya Espiritu na, ay lano, habaytoy Espiritu ya mamabiyay kamoyun oman.

<sup>12</sup> Kabay patêl ha Panginoon, main kitamon utang ya nakêm hên honolên ya Espiritu ni Apo Namalyari, haka alway nan kalabayan lawini tamo hên manyag kasalanan. <sup>13</sup> Ta no anhonolên yo pon ya kalabayan hên lawini yo hên manyag kasalanan, ay migtan kaw ha kamatsan hên midayo kan Apo Namalyari, hên parusaan hên ayn angga. Noa, madyanan kaw hên biyay ya ayn angga, no ha kapangyarihan nan Espiritu ni Apo Namalyari, ay talibatokan yoy kalabayan yo hên manyag kasalanan. <sup>14</sup> Ta hilay paakay ha Espiritu ni Apo Namalyari ay yabay ya maának ni Apo Namalyari. <sup>15</sup> Ta gawan ha Espiritu ni Apo Namalyari, ya indigalo ni Apo Namalyari kantamo, ay hikitamoy dinyag maának ni Apo Namalyari. A na kitamo dinyag ipoh ya malimon maparusaan ya nanad mana tamon pamimiyay. Noa, ha kapangyarihan nan Espiritu ni Apo Namalyari, ay mabaëg tamo yay nan Tatang hi Apo Namalyari. <sup>16</sup> Haka ya Espiritu ni Apo Namalyari ya ampamaptêg hên kalamo hên nakêm tamo, ya hikitamo ay maának nay na ni Apo Namalyari. <sup>17</sup> Haka gawan maának na kitamina, ay tanggapêñ tamo ya in-il-an na para kantamo hên kalamo ni Apo Jesu-Cristo. Ta no têêhêñ tamoy pamairap\* gawan ha paniwala tamo kan Apo Jesu-Cristo, hên nanad ha pamakiatag tamo hên hiyay nagdusa, ay

---

\* **8:17** 2 Corinto 1:5, 1 Pedro 4:13, 2 Timoteo 2:11-12.

mamaala kitamo etaman hēn kalamo na ha langit.

*Ya pamangēnggan ha pamamaala hēn kalamo ni  
Apo Jesu-Cristo*

<sup>18</sup> No an-ihipēn koy kairapan ya angkatanam tamo di ha luta, ay taganán tampol tamon liwaan ya habayto, gawan lano ay mamaala kitamo hēn kalamo ni Apo Jesu-Cristo ha langit hēn ayn angga. <sup>19</sup> Alwan bat hikitamo noa, ya kaganawan ya dinyag ni Apo Namalyari, ay labay-labay hēn tam-pol nay na dayin ipamwang no hino hilay mantēg nan maának. <sup>20</sup> Ta inalíh na pon ni Apo Namalyari ya alagá hēn dinyag na. A la labay hēn parusaan hilan êmbayro, noa, habaytoy tinalagá na. Êmbayro man, ay main hilan maêngganan, <sup>21</sup> gawan tinalagá ni Apo Namalyari ya kaganawan ya dinyag na, ay mibuhan ha kapangyarihan hēn kamatsan, haka milamo ha maának na lano hēn bayoên, boy dyanan hēn kahampatan ya ayn kapantag. <sup>22</sup> Muwang tamo ya paubat hēn haton lagi, ay ampan-agul ya kaganawan dinyag, hēn nanad ha babayi ya angkairapan ha pamanganak. <sup>23</sup> Alwan bat hilay habaytoy kaatag ya dinyag ya angkairapan, noa, hikitamo êt, ya pinaigan hēn Espiritu ni Apo Namalyari, ya unan indigalo ni Apo Namalyari kantamon ampaniwala. Ya kaihipan tamo ay nanad ampan-agul êt ha pamangēnggan tamo ha pamipamwang ni Apo Namalyari ya hikitamoy mantēg nan maának, ya hagilyan lano ya lawini hēn panlangit ya ahina matsi. <sup>24</sup> Gawan habaytoy an-êngganan tamo paubat hēn naligtas kitamo. Ta no natupad ya habayto, ay yarin êngganan tamo ya pon! Ayn ampangênggan ha natupad. <sup>25</sup> Noa,

gawan a pon natupad ya an-êngganan tamo, ay ampangênggan kitamo hên main pamagtêêh.

**26** Alwan bat ha sigurado tamo ya maêngganan tamo ya habayto, noa, ya Espiritu ni Apo Namalyari ay ampanawop kantamo etaman ha pamalangin tamo, gawan a tamo muwang, no ay-êmén, haka no hino ya dapat tamon ihalangin. Kabay hiyay ampakihabi kan Apo Namalyari para kantamo hên main pamanguyámêh, ya a makwan habtan. **27** Hi Apo Namalyari etaman, ya ampakamwang hên laman nakêm, ay muwang na etaman ya an-iabot kana hên Espiritu na, ya ampakihabi kan Apo Namalyari para kantamo, ya pinili na hên mag-in kana, ta habaytoy ayon ha kalabayan na.

**28** Muwang tamo ya balang angkalyari kantamo ay mag-in ha ikakangêd tamon ampanlugud kana, ya pinili na ha pamanhumonol ha tinalagá na. **29** Hêñ haton lagi, hêñ bayo na dinyag ya luta, ay muwang nay na ni Apo Namalyari no hinoy mag-in maának na, haka pinili na hila hêñ humonol ha pamimiyay hêñ Anak na, ya hi Apo Jesu-Cristo. Ha êmbayro ay hi Apo Jesu-Cristo ya mag-in pinakakabaya tamon kal-atan mipapatêl. **30** Haka hikitamoy pinili na hêñ mag-in nanad kan Apo Jesu-Cristo, ay hinagyat na hêñ humonol kana. Intad na kitamo êt hêñ ayn kasalanan, haka lano ay makapakiatag kitamo ha pamamaala ni Apo Jesu-Cristo.

*Ya pamanlugud ni Apo Namalyari kantamo  
gawan kan Apo Jesu-Cristo*

<sup>31</sup> Kabay mahabi tamo, ya gawan gampian na kitamo ni Apo Namalyari, ay taganán ayn makahambut kantamo! <sup>32</sup> A na in-imot ya kamihamihaan nan Anak, ya hi Apo Jesu-Cristo, ta in-utoh nan matsu ha ikakangêd tamon balang miha. No dinyag ni Apo Namalyari ya habayto, yarin a na idin kantamo ya kaganawan kailangan tamo! <sup>33</sup> Yarin main makapayhumbung hén kasalanan tamo kan Apo Namalyari, ya namili kantamo, haka namitad kantamon ayn kasalanan! <sup>34</sup> Ayn taganán makapaghabi ya dapat kitamon parusaan ha impiyerno, gawan hi Apo Jesu-Cristo mismo ya natsi para kantamo! Biniyay yan oman, haka atsi yay na hén ampamaala ha dapit panabtab ni Apo Namalyari, hén ampakihabi kan Apo Namalyari ha ikakangêd tamo. <sup>35</sup> Ayn taganán makapihiyay kantamo ha pamanlugud ni Apo Jesu-Cristo! Agyan malatngan kitamo hén kairapan, kapahiran nakém, pamairap kantamo hén kapareho tamo gawan ha paniwala tamo, hadyay lonoh, ayn maitakop, hinoman ya kapapotog, o patsên la kitamo man, ay ayn taganán makapihiyay kantamo ha pamanlugud ni Apo Jesu-Cristo. <sup>36</sup> Ya êmbayroy kairapan ay nanad ha impahulat ni Apo Namalyari, ya wanana hulat, “Gawan ha paniwala naén kamo, Panginoon, ay labay la kay patsên hén boon allo.

Nanad kay hén tupa ya maranin patsên.”<sup>†</sup>

<sup>37</sup> No maranasan tamo man ya êmbayroy kairapan, ay taganán ubuhén tamon hambutén ya habayto, gawan kan Apo Jesu-Cristo ya ampanlugud kan-

---

<sup>†</sup> 8:36 Awit 44:22.

tamo. <sup>38</sup> Angkasigurado ko ya matsi kitamo man, o mabiyay kitamo pon, ay matanam tamoy pamanlugud na. Ayn makapihiyay kantamo ha pamanlugud ni Apo Jesu-Cristo, anghel man, o hilay nangarawak ya a angkahêlêk, o hinon kapang-yarihan, o hinon angkalyari amêhén, o ya a êt nalyari, ya lumatêng, <sup>39</sup> o hinon atsi bayro ha tagay o bayri ha aypa, o hinoman pon ya a inungkat, ay taganán ayn makapihiyay kantamo ha pamanlugud ni Apo Namalyari, ya angkatanam tamo gawan kan Panginoon tamon Jesu-Cristo.

## 9

### *Makatoynungan hi Apo Namalyari hên mangin-galo ha labay na*

<sup>1</sup> Main akon labay ipamwang kamoyu ya tungkol ha kapareho kon Israelita ya taganán pêtég. Muwang koy pêtég ya habaytsi gawan ha pakikimiha ko kan Apo Jesu-Cristo, haka malinis ya konsinsya ko gawan ha Espiritu ni Apo Namalyari ya ampamaala ha nakêm ko. <sup>2</sup> Hadyay kalungkutan ko haka ampamalagêhbêg ya nakêm ko, <sup>3</sup> ta kal-atan kanlan kapareho kon Israelita ay a pon ampaniwala ya hi Apo Jesu-Cristo ay hiyay Mámiligtas ya an-êngganan la. No malyari dayi, ay hiko tanay parusaan ha impiyerno miligtas hila tana dayi. <sup>4</sup> Ta hila ay kapareho kon Israelita, ya dinyanan karapatan ni Apo Namalyari hên magin maának na. Impahlêk na kanla ya panga-Diyos na. Mangêd ya nakipagkahundoan ya kanla. Indin na kanla ya pangako na ya ingalwan na hila, haka mal-at pon ya pangako, haka ya Kautuhan.

Intoro na kanla ya pêtêg ya pamagsimba. <sup>5</sup> Ya ninuno naên ay anggalangên hên paubat hên haton lagi, haka ya Mesias, ya Mámiligtas ya hi Apo Jesu-Cristo ay nangubat kanla hên hiyay nag-in tawo. Hiya hi Apo Namalyari ya ampamaala ha hinon atsi ha langit haka ha luta. Purién ya hên ayn-angga. Amen.

<sup>6</sup> A ko anhabién ya a natupad ya impangako ni Apo Namalyari kanlan kapareho kon Israelita gawan ha kal-atan la, ya a ampaniwala kan Apo Jesu-Cristo, ta main Israelita ya alwan taganán maának ni Apo Namalyari. <sup>7</sup> Haka miha pon, ya intad ni Apo Namalyari hên mantêg kaapo-apoan ni apo Abraham ay hilan bat ya kaapo-apoan nan anak na, ya hi Isaac, ta wani Apo Namalyari kan apo Abraham, “Ya itad mon kaapo-apoan mo, ya impangako ko kamo, ay hilay habayton bat ya mangubat kan Isaac.”\* <sup>8</sup> Ya labay habiên, ay a nan ubuhêni Apo Namalyari hén itad maának na ya mag-in kaapo-apoan ni apo Abraham, noa, hilay haton bêngat ya mangubat kan Isaac, ya impangako. <sup>9</sup> Ta habaytsi ya impangako ni Apo Namalyari kan apo Abraham, ya wana, “Mag-orong ako di ha mihay taon. Ha pag-orong ko ay manganak hên lalaki ya ahawa mo, ya hi Sara.”†

<sup>10</sup> Alwan bêngat habaytoy hinabi ni Apo Namalyari kan apo Abraham, ya ampamipahlék no ay-êmên yan ampamili hi Apo Namalyari. Ta main êt êmbayro ya nalyari kanlan kambal ya hi Jacob haka hi Esau, ya anak ni Isaac kan Rebecca. <sup>11-12</sup> Gawan bayo hilan in-anak ya kambal haka

---

\* **9:7** Genesis 21:12. † **9:9** Genesis 18:10,14.

bayo hila nakadyag hēn kangēran o karawakan, ay impamwang nay na ni Apo Namalyari ya tinalagá na, ta êmēn mamwangan ya pinili na kanlan lowa, ay alwan gawan ha dinyag la, noa, gawan antuparēn nay tinalagá na, ta hinabi na kan Rebecca, ya wana, “Ya unan umawah kanlan lowa ay maghuyo ha humonol kana.”‡ 13 Embayro êt ya labay habiēn hēn impahulat ni Apo Namalyari, ya wana, “Hi Jacob ay nilugud ko, noa, hi Esau ay a ko labay.”§

14 Kayno main maghabi ya main yan anggampian hi Apo Namalyari. Taganán a la dapat habiēn ya habayto! 15 Gawan main yan katoynungan hēn manyag habayto, ta wana kan apo Moises, “Angkaingalo ko ha labay kon kaingalwan.”\* 16 Kabay muwang tamo ya pamamili ni Apo Namalyari hēn mag-in maának na, ay alwan pamanhumonol ha kalabayan tawo, o gawan ha dyag la, noa, gawan ingalo na. 17 Ihipēn tamo ya Kahulatan ya impahulat ni Apo Namalyari, no hinoy nakahulat bayro ya hinabi ni Apo Namalyari kan Faraon, ya ari ha Egipto hēn haton lagi, “Dinyag katan ari ta êmēn ipahlék ya kapangyarihan ko kamo, haka ta êmēn mamwangan ha boon luta ya langan ko.”† 18 Kabay muwang tamo ya angkaingalwan na, ay hatoy labay nan kaingalwan. Haka pakdēyēn nay ulo lan hatoy labay nan pakdēyēn ya ulo.

*Parusaan ni Apo Namalyari ya dapat nan parusaan*

---

‡ 9:11-12 Genesis 25:23. § 9:13 Malakias 1:2-3. \* 9:15 Exodo 33:19. † 9:17 Exodo 9:16.

<sup>19</sup> Kayno main kamoyu ya mangotáng hên êmên di, “No êmbayro, ay awta anhêhêen ni Apo Namalyari ya tawo ha pamanyag kasalanan? Hinoy makahalanghang ha tinalagá na?” <sup>20</sup> Ya mahabi ko etaman, ay tawo kan bêngat. Ayn kan katoynungan hên mangotáng kan Apo Namalyari hên êmbayro. Yarin main korên ya mangotáng ha nanyag kana, “Awta dinyag mo kon êmên di?” <sup>21</sup> Atsi kanan manyag korên no hinoy daygén na. Bayro ha naorit ya luta ya gamitén na, ay malyari yan manyag hên pan-allo-allo hên gamitén o ya pambisitan bat, atsi kana ya habayto.

<sup>22</sup> Êmbayro êt kan Apo Namalyari. Main yan katoynungan hên manyag no hinoy labay na. No labay nan ipahlék ya huluk na haka ya kapangyarihan na hên parusaan hilay mapanyag karawakan, ay atsi kana. Noa, pinagtêéhan na hila pon, <sup>23</sup> ta êmên maipahlék ya panga-Diyos na kanlan an-ingalwan na, ya in-il-an na hên mag-in kalamo na ha langit. <sup>24</sup> Kalamo kitamo bayro ha an-ingalwan na ya pinili na, haka alwan bat hikay ya Israelita, noa, hikaw êt ya alwan Israelita. <sup>25</sup> Habayto ay nanad ha impahulat na kan apo Oseas,

“Hilay a ko pinili, ay itad kon pinili ko, haka hilay a ko nilugud, ay lugurên ko.

<sup>26</sup> Bayro ha legal ya pinaghbian ko kanla ya alwa hilan maának ko, ay baégén hilay nan maának ni Apo Namalyari, ya angkabiyay hên angga-angga.”‡

---

‡ 9:26 Oseas 2:23, 1:10.

<sup>27</sup> Habaytsi etaman ya impamwang ni Propeta Isaias ya tungkol ha Israelita, ya wana,  
“Mag-in hila man hēn kalakē hēn balah ha laylay  
hēn dagat, ay u-ungnon bēngat kanla ya  
miligtas.

<sup>28</sup> Ta bigla nan ubuhēn hēn parusaan ni Apo Namalyari ya dapat nan parusaan diha luta.”<sup>§</sup>

<sup>29</sup> Wana pon êt ni Propeta Isaias,  
“Ha ingalo hēn Panginoon ya makapangyarihan,  
ay namitagan yan ungno kannaēn hēn Israelita.

No a na dayin dinyag ya habayto, ay nag-in kitamina dayin nanad kanlan taga-Sodoma, haka taga-Gomorra ya inubuh hēn pinatsi.”\*

*Hilay Israelita ay a naniwala ya hi Apo Jesus, ay yabay ya Mesias, ya Cristo ya impangako*

<sup>30</sup> Habaytsi tanay kabooan hēn labay kon habiēn. Hilay alwan Israelita, ya a piniakikwanan hēn mag-in ayn kasalanan ha hēlēk ni Apo Namalyari, ay intad nan ayn kasalanan, gawan ha paniwala la kan Apo Jesu-Cristo. <sup>31</sup> Noa, hilay Israelita ya pinakikwanan hēn mag-in ayn kasalanan ha hēlēk ni Apo Namalyari ha pamanhumonol la ha Kautuhan ni apo Moises, ay a awud nag-in ayn kasalanan. <sup>32</sup> A hila nag-in êmbayro, gawan êndat lan mag-in hilan ayn kasalanan ha pamanyag lan kangēran alwan gawan ha paniwala. A hila naniwala kan Apo Jesu-Cristo, ta hiyay nanad ha bato ya pinibátolan la. <sup>33</sup> Habaytoy nanad êt ha nakahulat ya tungkol ha Mesias, ya Cristo,

---

§ **9:28** Isaias 10:22-23. \* **9:29** Isaias 1:9.

“Hêlkên yo! Main akon indin ya miha ya nanad bato ha Sion.<sup>†</sup> Hiyay pinibátolan la. Noa, hilay maniwala kana ay a mahira ya nakêm.”<sup>‡</sup>

## 10

<sup>1</sup> Hikaw ya patêl ko ha Panginoon, boon nakêm, ay labay ko dayin miligtas ya kapareho kon Israelita. Habaytoy panay kon an-ihalangin kan Apo Namalyari. <sup>2</sup> Angkapaptêgan ko ya ampatolukên lan maghuyo kana, noa, alwan usto ya pamaghuyo la. <sup>3</sup> Gawan matag-ay ya nakêm la, ay a la antanggapên ya an-idigalo ni Apo Namalyari, no ay-êmên na hila dayin itad hêñ ayn kasalanan, ta êndat la ya itad hilan ayn kasalanan ha pamanhumonol ha Kautuhan. <sup>4</sup> Noa, gawan kan Apo Jesu-Cristo ay ayn nanan an-itad hêñ ayn kasalanan ha pamanhumonol ha Kautuhan, ta an-itad ni Apo Namalyari hêñ ayn kasalanan ya kaganawan ya ampaniwala kan Cristo.

### *Ya kaligtasan ay para ha balang miha*

<sup>5</sup> Habaytsi ya hinulat ni apo Moises ya tungkol ha mag-in ayn kasalanan ha hêlêk ni Apo Namalyari, gawan ha pamanhumonol ha Kautuhan, ya wanana hulat, “Hilay taganán ampanonol ha balang utoh ay madyanan biyay ya ayn anggaan.”\* <sup>6</sup> Noa, impahulat êt ni Apo Namalyari ya ampamipamwang kantamo ya gawan bêngat ha paniwala kan Apo Jesu-Cristo, ay an-itad na kitamina ni Apo Namalyari hêñ nanad

---

<sup>†</sup> 9:33 balayan Jerusalem.    <sup>‡</sup> 9:33 Isaias 8:14, 28:16. Hêlkên etaman ha 1 Pedro 2:6-8.    \* 10:5 Levitico 18:5. Hêlkên yo etaman ha Galacia 3:12.

ayn kasalanan. Êmén di ya wanana habaytoy hulat, “Paan yon habiên ha nakêm yo, ya kailangan main munik ha langit hên mangalap kan Cristo. <sup>7</sup> Haka paan yon habiên ha nakêm yo, ya kailangan main tumaoy ha logal lan natsi hên mamabiyay kan Cristo. <sup>8</sup> Ta atsi kamoyu ya habi ni Apo Namalyari. Atsi ya ha nakêm yo, haka maipamwang yo ya.” Habaytoy habi ni Apo Namalyari ya an-ipamwang naêñ ya tungkol ha paniwala kan Apo Jesu-Cristo. <sup>9</sup> Yabay ya no ipamwang yo hi Apo Jesu-Cristo, ya hiyay pinaka-Panginoon, haka ampaniwala kaw hên boon nakêm ya hiyay biniyay oman ni Apo Namalyari, ay miligtas kaw. <sup>10</sup> Gawan boon nakêm kitamon ampaniwala, ay an-itad na kitamo ni Apo Namalyari hên ayn kasalanan, haka ha pamipamwang tamo ya ampaniwala kitamo kan Apo Jesu-Cristo, ay miligtas kitamo. <sup>11</sup> Bayro ha Kahulatan ya impahulat ni Apo Namalyari ay main nakahulat, ya wana, “Noa, hilay ampaniwala kana, ay a mahira ya nakêm.”<sup>†</sup> <sup>12</sup> Ya labay habiên hên habayto, ay parehon bat ha hêlêk ni Apo Namalyari, ya hilay Israelita, haka hilay alwan Israelita. Mimihay Panginoon hên balang miha, haka mahiglay nakêm yan ampam-i ha kaganawan ampakiingalo kana. <sup>13</sup> Ta impahulat ni Apo Namalyari, ya wanana hulat, “Hinoman ya makiingalo ha Panginoon ay miligtas.”<sup>‡</sup>

<sup>14</sup> Noa, ay-êmén hilan makapakiingalo ha Panginoon ya kaatag, no ayn hila pon paniwala kana? Ay-êmén hilan maniwala kana, no a la pon nag-

---

† 10:11 Isaias 28:16. ‡ 10:13 Joel 2:32.

ilam ya tungkol kana? Haka ay-êmên lan magilaman ya tungkol kana, no ayn mamipamwang kanla hên habayto? <sup>15</sup> Haka ay-êmên magkamain hên mâmipamwang no ayn mamiutoh kanla? Ha kaptégan ay main nanan in-utoh, ta impahulat ni Apo Namalyari, ya wanen hulat, “Ampakapahigla hilay mâmipamwang hên mangangêd ya habi!”<sup>§</sup> <sup>16</sup> Noa, u-ungnon bat ya naniwala ha Mangêd ya Habi, ta wanen hulat ni Propeta Isaias, “Panginoon, hinoy naniwala ha hinabi naên?”\* <sup>17</sup> Embayro man, ya paniwala tamo kan Apo Jesu-Cristo ay nangubat ha pamanggilam hên kaptégan ya tungkol kana.

<sup>18</sup> Yarin a la êt nagilam hên kapareho kon Israelita ya tungkol kan Apo Jesu-Cristo! Taganán nagilam lay na, ta impahulat ni Apo Namalyari, ya wanen hulat, “Nibahwag ha boon luta ya balita.

Ayn hinon logal ya a naabutan hên habayto.”†

<sup>19</sup> Yarin a la êt naintindihan hên kapareho kon Israelita ya tungkol kan Apo Jesu-Cristo! Siguradon naintindihan lay na, noa, a la pinaniwal-an ya habayto, ta impahulat ni Apo Namalyari kan apo Moises, ya wanen hulat,

“Paimonên kataw kanlan alwan Israelita, haka pahulukên kataw kanlan ayn muwang hên tungkol kangko.”‡

<sup>20</sup> Ya impahulat ni Apo Namalyari kan Propeta Isaias ay malinaw. Êmên di ya wanen hulat,

---

§ **10:15** Isaias 52:7. \* **10:16** Isaias 53:1. † **10:18** Awit 19:4.

‡ **10:19** Deuteronomio 32:31.

“Hilay a nanapol kangko ay hila ya nakahêlêk kangko.

Nagpahlék ako kanlan a nanapol kangko.”<sup>§</sup>

<sup>21</sup> Habaytsi pon ya impahulat ni Apo Namalyari kan Propeta Isaias, ya tungkol ha kapareho kon Israelita,

“Bapan buyot kinan ampanagyat kanla, noa, alwa hilan mahonol, haka nakdêy ya ulo la.”\*

## 11

### *An-ingalwan ni Apo Namalyari hilay Israelita*

<sup>1</sup> Kayno êndat yon tinalibatokan hila ni Apo Namalyari ya hilay kapareho kon Israelita gawan a hila naniwala! Siguradon ahê! Ta hiko man ay mihay Israelita, haka hi apo Abraham haka hi apo Benjamin ay ninuno ko. <sup>2</sup> A na pinaulayan ni Apo Namalyari ya una nan pinili hên hato. Panêmtêmén yoy balita ni apo Elias\* kan Apo Namalyari hên tungkol ha dinyag lan kapareho nan Israelita, ya nakahulat ha Kahulatan ya impahulat ni Apo Namalyari, ya wana, <sup>3</sup> “Panginoon, pinatsi lay kapareho kon mámpamwang hên an-ipaihip mo kannaên. Inagwat lay pamiulaman hên an-iátang kamo. Mimiha ko tanay natágan haka labay la kon patsên.” <sup>4</sup> Noa, hinabi kana ni Apo Namalyari, ya wana, “Main pon hên piton libo ya lalaki ya kapareho mo ya impapawa ko ya a ampagsimba kan Baal, ya alwan pêtêg diyos.” Habaytoy hinabi ni Apo Namalyari kan apo Elias. <sup>5</sup> Embayro êt amêhêñ, main pon ungnoy kapareho

---

§ **10:20** Isaias 65:1. \* **10:21** Isaias 65:2. \* **11:2** 1 Hari 19.

kon Israelita ya ampaniwala kan Apo Jesu-Cristo, ya pinili ni Apo Namalyari, gawan ha ingalo na ya ayn kapantag. <sup>6</sup> Haka no hikay pinili gawan ha ingalo na, ya ayn kapantag, ay habaytoy alwan gawan ha hinon kangéran dyag naén, noa, gawan bat ha ingalo na, ya ayn kapantag.

<sup>7</sup> Ya labay habiên hên habayto, ay u-ungnon bat ya kapareho kon Israelita ya labay hên mag-in ayn kasalanan, ay pinili hên maniwala kan Apo Jesu-Cristo. Hilay kal-atan ay pinakdêy nay na ya ulo. <sup>8</sup> Habaytoy nanad ha impahulat ni Apo Namalyari, ya wanana hulat,

“Dinyanan hila ni Apo Namalyari hên kaihipan hên nanad ha kaihipan hên mihay angkabélew.

Kabay angga amêhêñ, agyan main hilan mata, ay a hila ampakahélék, haka agyan main hilan têkk, ay a hila ampakagilam.”<sup>†</sup>

<sup>9</sup> Haka main yan impahulat hi Apo Namalyari kan Arin David, ya tungkol kanlan ayn paniwala, ya wanana hulat,

“Dayi ya kaluto la, ay mag-in nanad paén ha pamandakép kanla. Bigla hila dayin madakép hên nanad ha manok lalé, o ayop ya minabo ha patsibung ta êmén hila maparusaan.

<sup>10</sup> Gumulagê ta dayi ya mata la, ta êmén hila a kahélék,

haka dayi tumukoko<sup>‡</sup> hila kaban angkabiyay hila, gawan ha kairapan ya angkatanam la.”<sup>§</sup>

<sup>11</sup> Nibatol hilay kapareho kon Israelita, ta a hila naniwala kan Apo Jesu-Cristo. Kayno êndat yon

<sup>†</sup> **11:8** Deuteronomio 29:4, Isaías 29:10.    <sup>‡</sup> **11:10** bumokót.

<sup>§</sup> **11:10** Awit 69:22-23.

a hilay na miligtas! Alwa, ta main hila pon hēn panaon hēn miligtas! Gawan ha pamibatol la, ya kasalanan la ya a hila naniwala, ay nadyanan kaligtasan hilay alwan Israelita, kabay mangimon hilay Israelita, gawan labay la etaman hēn miligtas. <sup>12</sup> Hadyay ingalo ni Apo Namalyari kanlan alwan Israelita gawan ha kasalanan lan Israelita ya a naniwala. Kabay taganán igit pon bayro ya ingalo na kanla no maniwala hilay nay Israelita.

### *Ya kaligtasan lan alwan Israelita*

<sup>13</sup> Habaytsi etaman ya labay kon habiēn kamoyun alwan Israelita. Gawan hikoy in-utoh ni Apo Namalyari hēn manoro kamoyu, ay boon nakêm kon tuparêñ ya tungkulang ko, <sup>14</sup> ta êmêñ hila mangimon hilay kapareho kon Israelita, haka ha êmbayro, ay main ungro kanla ya miligtas. <sup>15</sup> Ta no ya pamaulay kanla, ay nag-in dann ta êmêñ madyanan kaligtasan hilay alwan Israelita, hēn makiúmang kan Apo Namalyari, ay lalon mangêd no maniwala hila kan Apo Jesu-Cristo ya hilay kapareho kon Israelita, ta nanad bayton nabiyay oman ya natsi.

<sup>16</sup> Ya ninuno naêñ hēn Israelita ay maialimbawa ha duman ya imparaêp kan Apo Namalyari. Haka hikay, ay maialimbawa ha kaganawan ya naga-pah, ya kan Apo Namalyari etaman. Ya ninuno naêñ hēn Israelita, ay maialimbawa etaman ha yamot hēn mihay kayo. Haka hikay, ay maialimbawa ha hanga. No kan Apo Namalyari ya yamot, ay kana ya anggan hanga. <sup>17</sup> Main kapareho kon Israelita ya nanad hanga hēn mantêg kayon olibo, ya pinutoh gawan a hila naniwala kan Apo

Jesu-Cristo, haka hikaw ya alwan Israelita, ay nanad hanga hên olibo ya bat tinumubo ha lalê, ya pinutoh, haka intumpang ha pinamutohan hên hanga hên mantêg olibo. <sup>18</sup> Kabay paan yon mus-musên hilay nanad hanga ya pinutoh, haka paan kaw maglambung, ta alwan hikaw ya ampam-abiyay ha yamot, noa, ya yamot ay ampamabiyay kamoyu.

<sup>19</sup> Kayno main kamoyun maghabin êmên di, “Mangêd kay ya alwan Israelita, ta main pinutoh, ta êmên kay mihagili kanla.” <sup>20</sup> Pêtêg ya main pinutoh, ta êmên kaw mihagili kanla. Noa, pinutoh hila gawan a hila naniwala, haka inhagili kaw kanla gawan ha paniwala yo. Kabay paan kaw manghip ya mangêd kaw kanla, paan kaw magmahlay, haka kaillag kaw, <sup>21</sup> ta no a na ampahayangan ni Apo Namalyari ya mantêg hanga, ay yarin pa-hayangan na kaw, ya intumpang bat! <sup>22</sup> Bayri tamon mahêlêk no ay-êmên yan mangingalo, haka no ay-êmên yan mamarusa. Pinarusaan na hilay a naniwala, noa, an-ingalwan na kaw no ihundo yoy paniwala yo. Noa, no a yo ihundo ya paniwala yo kanan ampangingalo kamoyu, ay potohêna kaw. <sup>23</sup> Hila man ya kapareho kon Israelita ay maitumpang, no a la ipalêkpêk ya kakdêyan ulo la hên a maniwala, ta main yan kapangyarihan hi Apo Namalyari hên itumpang hilan oman. <sup>24</sup> No hikaw ya alwan Israelita, ya nanad hanga hên olibo ya bat tinumubo ha lalê ya pinutoh, ay nai-tumpang ni Apo Namalyari ha pinamutohan hên hanga hên mantêg olibo, ay taganán maitumpang nan oman ya mantêg hanga ha ubatan la.

*Ya ingalo ni Apo Namalyari kanlan Israelita*

<sup>25</sup> Patêl ko ha Panginoon, main ako pon hên ipamwang kamoyu ya a pon impamwang hên hato, ta êmên a kaw mangihip ya mangêd kaw kanlan kapareho kon Israelita. Ya kakdêyan ulo la hên a maniwala hên hilay kapareho kon Israelita, ay angga ha a maboo ya bilang lan alwan Israelita ya miligtas. <sup>26</sup> Pangayarin habayto ay miligtas ya kaganawan kapareho kon Israelita hên nanad ha impahulat ni Apo Namalyari, ya wanana hulat,

“Ya Mâmiligtas ay lumatêng hên ubat ha Sion, alihêñ nay karawakan lan kaapo-apoan ni apo Jacob.

<sup>27</sup> Haka habaytoy pamanupad kon kahundoan ko kanla hên hato, ya alihêñ koy kasalanan la.”\*

<sup>28</sup> Gawan ha a la tinanggap ya Mangêd ya Habi, hilay Israelita, ay hilay nag-in kapatsi ni Apo Namalyari, haka habaytoy nag-in ikakangêd yon alwan Israelita. Noa, anlugurên na hila pon êt, ta gawan hilay pinili na hên hato, haka gawan ha impangako na ha ninuno la. <sup>29</sup> Ta a ampan-goman ya ingalo na, haka ya tinalagá na kanlan pinili na. <sup>30</sup> Hikaw ya alwan Israelita, ay a kaw pon hinumonol kana hên hato, noa, naingalwan kaw na, gawan ha a pamanhmonol lan Israelita. <sup>31</sup> A hila pon ampanonol kana, noa, lano mapakinabangnan la etaman ya ingalo ni Apo Namalyari nanad ha napakinabangnan yo ya ingalo na kamoyu. <sup>32</sup> Pinaulayan na ya balang miha hên

---

\* <sup>11:27</sup> Isaias 59:20-21, Jeremias 31:31, 34.

mag-in ipoh ha pamanalanghang, ta êmêñ na hila maingalwan.

*Purién hi Apo Namalyari*

<sup>33</sup> Ayn kapantag ya ingalo ni Apo Namalyari! Ayn anggaan ya kagalingan haka kamwangan na! Ayn ampakaintindi ha hinon tinalagá na, haka no ay-êmêñ nan tuparêñ ya habayto! <sup>34</sup> Ta êmêñ ya di ya impahulat ni Apo Namalyari, ya wanana hulat, “Ayn hinoman ya makamwang hên kaihipan ni Apo Namalyari.

Haka ayn hinoman ya makapayo kana.”<sup>†</sup>

<sup>35</sup> “Ayn hinoman ya nakapam-i kan Apo Namalyari,  
ta êmêñ hila main maêngganan kana ta ya kaganawan ay ubat kana.”<sup>‡</sup>

<sup>36</sup> Gawan hiyay nanyag hên kaganawan, haka hiyay ampamaala bayro. Purién ya hên ayn angga! Amen.

## 12

*Ya bayoy biyay lan main pakikimiha kan Apo Jesu-Cristo*

<sup>1</sup> Patêl ko ha Panginoon, gawan ha hadyay ingalo ni Apo Namalyari kantamo, ay ampakihiabi ko kamoyu ya idin yoy boon biyay boy nakêm yo kan Apo Namalyari hên nanad átang, ya angkabiyay, ya banal, haka ya an-ikahigla kana. Habaytoy hépat ya pamagsimba kana.  
<sup>2</sup> Paan kaw pagtan kanlan a ampagpalokop kana, noa, paulayan yon bayoén na ya kaihipan yo,

---

<sup>†</sup> **11:34** Isaias 40:13, 1 Corinto 2:16.    <sup>‡</sup> **11:35** Job 41:11.

ta ha êmbayro ay mag-in bayo ya pamimiyay yo. Mamwangan yoy kalabayan na haka umayon kaw bayro, ta êmén yo madyag ya mangêd, haka ya ikahigla na, haka ya taganán usto.

<sup>3</sup> Gawan ha tungkulan hên apostol ya indin ni Apo Namalyari kangko, ay an-aralan kataw ya paan kaw magmahlay, noa, dapat kaw mag-in manakêm no an-ihipêñ yoy galing, ya indin kamoyu ni Apo Namalyari, gawan ha paniwala yo kan Apo Jesu-Cristo. <sup>4</sup> Ya lawini tamo ay kabooan hên ulo, mata, bitsih, haka mal-at pon ya pinilalamo, haka alwan pare-pareho ya andaygên lan habaytoy pinilalamo. <sup>5</sup> Êmbayro etaman ya hikitamoy ampaniwala kan Apo Jesu-Cristo, agyan mal-at kitamo, ay maialimbawa kitamo ha mimihay lawini, gawan ha pakikimiha tamo kan Apo Jesu-Cristo, haka ampihahawop kitamo. <sup>6</sup> Ya balang miha kantamo, ay dinyanan ni Apo Namalyari hên galing ya dapat tamon gamitêñ. No indin kantamo ya galing hên mamipamwang hên an-ipaihip na kantamo, ay ipamwang tamo ya habayto ha pamanhumonol ha paniwala tamo kana. <sup>7</sup> No indin kantamo ya galing hên manawop ha kapareho, ay dapat pêtêg ya pamanawop tamo. No indin kantamo ya galing hên manoro, ay dapat magpakahipêg kitamo ha pamanoro tamo. <sup>8</sup> No indin kantamo ya galing hên mam-in aral, haka mamakhaw nakêm, ay dapat habayto ya daygên tamo. No indin kantamo ya galing hên mam-i, ay dapat mahiglay nakêm tamo hên mam-i. No indin kantamo ya galing hên mamaala, ay magpakahipêg kitamon mamaala. No indin kantamo

ya galing hēn mangingalo, ay mangingalo kitamo ha kaatag hēn main kahiglaan.

<sup>9</sup> Dapat mag-in pêtêg ya pamanlugud tamo. Dapat kahêmêkan tamoy karawakan. Dapat panay hēn manyag kangêran. <sup>10</sup> Dapat milulugud haka migagalang kitamo. <sup>11</sup> Dapat boon nakêm kitamo hēn magpakahipêg hēn maghuyo ha Panginoon. <sup>12</sup> Dapat ikahigla tamo ya an-êngganan tamo, dapat tamon têêhêh ya kairapan, haka dapat ihundo tamoy pamanalangin kan Apo Namalyari. <sup>13</sup> Dapat tamon hawpan hilay kapareho tamon pinili na hēn mag-in kana ha pangangailangan la, haka dapat mahiglan nakêm tamon pahowênen ha bali tamo ya hilay anlumagay.

<sup>14</sup> Dapat tamon ihalangin ya ingalwan hila dayi ni Apo Namalyari ya ampamairap kantamo. Paan tamo hilan ihumpa. <sup>15</sup> Dapat makihigla kitamo kanlan angkahigla, haka makilungkot kitamo kanlan ampaglunkot. <sup>16</sup> Dapat mamiyay kitamo hēn main pakikimiha. Paan kitamon mag-in matag-ay ya nakêm, noa, makilamo kitamo kanlan maaypa ya tungkulon. Paan tamon ihipen ya hikitamon bat ya main kamwangan.

<sup>17</sup> Paan tamon tumbahan hēn narawak ya nanyag karawakan kantamo. Pakikwanan tamon manyag hēn kangêran, ta êmên ayn mamintas kantamo. <sup>18</sup> No malyari, ay pakikwanan yon makilamo hēn mangêd ha balang miha. <sup>19</sup> Anlugarê kon patêl ha Panginoon, paan kaw manumbah kanlan ampanyag karawakan kamoyu, ta ipaulay yo tana kan Apo Namalyari ya habayto. Ta main yan impahulat hi Apo Namalyari, ya wanana hulat,

“Hiko ya Panginoon yo ya manumbah kanlan manyag karawakan kamoyu.”\*

**20** Alwan bat habayto, noa, dapat tamo etaman hēn honolēn ya habaytsi ya impahulat ni Apo Namalyari, ya wanana hulat,

“No angkablay lonoh ya kapatsi yo, ay pakanēn yo ya, haka no kainēm ya, ay painēmēn yo ya. Ha pamakan haka pamainēm yo kana, ay mipakarēng-êy ya haka maghēhē ya.”†

**21** Manambut kitamo no tumbahan tamon kangēran ya ampanyag karawakan kantamo.

## 13

### *Dapat palokop kanlan ampamaala ha gobyerno*

**1** Ya balang miha kantamo ay dapat palokop kanlan ampamaala ha gobyerno, ta ya balang tungkulon hēn mamaala ay ubat kan Apo Namalyari, haka hilay ampamaala ay pinili na. **2** Kabay hilay anhumalanghang kanlan ampamaala, ay anhumalanghang kanlan pinili ni Apo Namalyari, haka parusaan hila. **3** Hilay ampamaala ay dapat kalimwan hēn mapanyag karawakan. Hilay mapanyag kangēran ay ayn ikalimo kanlan ampamaala. Kabay no labay tamon a malimo kanlan ampamaala, ay magpakadyag kitamon kangēran, ta êmēn la kitamon dayēwēn hēn ampamaala kantamo. **4** Hilay ampamaala ay dinyanan ni Apo Namalyari hēn tungkulon la ha ikakangēd tamo. Noa, no manyag kitamon karawakan, ay dapat kitamon malimo kanla, ta main hilan katoynungan hēn mamarusa kanlan

---

\* **12:19** Deuteronomio 32:35. † **12:20** Kawikaan 25:21-22.

mapanyag karawakan. <sup>5</sup> Kabay dapat kitamon palokop kanla, alwan bat ha malimo kitamon parusaan, noa, gawan muwang tamo ya usto haka alwan usto.

<sup>6</sup> Ampamayad kitamon buwih gawan muwang tamo ya hépat ya habayto, ta hilay ampamaala, ya dinyanan tungkulon ni Apo Namalyari, ay angkumagal ha ikakangéed tamo. <sup>7</sup> Dapat tamon bayaran hén main pamanggalang ya hinon buwih ya hingilén lan ampamaala kantamo. Dapat tamo hilan galangén ya hilay ampamaala kantamo.

### *Dapat manlugud ha kapareho*

<sup>8</sup> No main kitamon utang, ay dapat tampol tamo hén bayaran ya habayto. Noa, ya utang nakém tamon manlugud ha kapareho tamo, ay dapat ayn angga. Hilay ampanlugud ha kapareho la ay anhumonol ha Kautuhan ni Apo Namalyari.

<sup>9</sup> Habaytoy Kautuhan, nanad ha, “Paan mamabayi o makilalaki, paan mamatsin kapareho, paan manakaw, paan bat maridya,” haka ya kaatag ya Kautuhan, ay angkaboo ha mimihay utoh, “Lugurén moy kapareho mo hén nanad ha pamanlugud mo ha sarili mo.” <sup>10</sup> Ta no anlugurén tamoy kapareho tamo, ay a tamo hilan ampanyagan karawakan, haka anhonolén tamo bayto ya kabooan hén Kautuhan.

<sup>11</sup> Dapat tamon daygén ya habayto, ta no ialimbawa tamo ya hata panaon ha angkawatah, ay mahabi ko ya nilumaténg ya oras êmén mimata, ta ya pamilitgas ni Apo Jesu-Cristo kantamo ha karawakan hén hata luta, ay marani yana. Marani ya améhén kanan una kitamon naniwala.

**12** Nanad kariglêman yabi ya karawakan bayri ha luta, noa, amêhêñ ay nanad angkawatah. Kabay itêgêñ tamoy pamanyag karawakan, haka boon nakêm kitamon manyag kangêran, ta habaytoy nanad ha an-ihulod tamoy kangêran, ya nanad ha pinaka-kalahag pagaw tamo ha pamanlumaban kan Satanas. **13** Dapat kitamon mamiyay hêñ malinis, ta atsi kitamina ha hawang. Paan kita-mon maglahing, paan makilahingan, paan mam-abayi, paan makilalaki, haka paan manyag hêñ hinon karawakan kalabayan lawini, paan maki-hubakan haka paan mahêm. **14** Ya dapat tamon daygêñ ay totoêñ tamoy pamimiyay ni Panginoon Jesu-Cristo, paan tamon honolêñ ya kalabayan lawini tamo hêñ manyag kasalanan.

## 14

### *Paan mihahatolya patêl ha Panginoon (1 Corinto 8:1-13; 10:23-33)*

**1-2** No main patêl ha Panginoon, ya alwa pon nananiêñ ha paniwala, ya ampag-alangan pon no imbawal ni Apo Namalyari hêñ mangna hêñ kêna, ta panay gulay tana ya pangkaêñ la, ay tanggapêñ yo hila, haka alwa yo hilan pakihubakan, am-paniwala kaw man ya ayn hinon pamangan ya imbawal ni Apo Namalyari. **3** Paan kaw mihahatol hêñ tungkol bayro, ta pare-pareho kaw tinanggap ni Apo Namalyari. **4** Ayn kitamon karapatan hêñ manatol ha nakiamo ha kaatag, haka êmbayro êt, ay ayn kitamon karapatan hêñ manatol ha ka-pareho tamon patêl ha Panginoon. Ya Panginoon

ay ampamaala kantamo, haka mahawpan na kitamon pare-pareho hēn manyag no hinoy usto.

<sup>5</sup> Main kantamon patēl ha Panginoon ya ampaghabi ya main allo, ya taganán in-il-an para magsimba kan Apo Namalyari, haka wanlan kaatag ya hinoman ya allo ay malyarin magsimba. Wangko etaman, ya dapat magsimba kaw ha pamanhumonol yo ha nakêm yo. <sup>6</sup> Hilay ampgsimba ha hinoman ya allo, ay ampagsimba ha Panginoon. Hilay mangna hēn hinon kēna ya an-ipahalamat la pon kan Apo Namalyari, ay gawan ha pamanggalang la ha Panginoon. Haka hilay a ampangna hēn hinon kēna, ay gawan êt ha pamanggalang la ha Panginoon, haka ampagpahalamatan la hi Apo Namalyari. <sup>7</sup> Ta ayn kantamo ya ampamiyay o natsi man ha ikahiglatamon bat, <sup>8</sup> ta dapat ha ikahigla hēn Panginoon ya pamimiyay haka ya kamatsan tamo. Kabay no angkabiyay kitamo pon o natsi man, ay kana kitamon Panginoon. <sup>9</sup> Gawan hi Apo Jesu-Cristo ay natsi haka nangoman nabiyay, ta êmēn na magin Panginoon lan angkabiyay haka Panginoon lan natsi. <sup>10</sup> Kabay paan kitamon mihahatol o mimusmusan, ta lano pare-pareho kitamon umarap ha hukoman ni Apo Namalyari. <sup>11</sup> Ta êmēn ya di ya impahulat ni Apo Namalyari, ya wanana hulat,

“Hikoy Panginoon yo, ya ampaghabi hēn taganán matupad ya habaytsi. Ya balang miha ay mandoko ha arapan kon magsimba kangko hēn habiēn ya hikoy Diyos.”

<sup>12</sup> Kanan habayto, ay umarap ya balang miha kan Apo Namalyari, ta lingonêñ kitamo.

*Paan manyag hēn hinoman ya pangubatan hēn  
pamanyag kasalanan hēn kapareho tamo  
(1 Corinto 6:12-20; 8:1-13)*

<sup>13</sup> Kabay paan kitamon miaatol, haka siguradoēn tamo hēn a manyag hēn hinoman ya pangubatan hēn pamanyag kasalanan hēn kapareho tamo. <sup>14</sup> Gawan ha pakikimiha ko kan Panginoon Jesu-Cristo, ay taganán muwang ko ya ayn pamangan ya an-ibawal ni Apo Namalyari, noa, no an-ihipēn hēn kaatag ya main pamangan ya an-ibawal ni Apo Namalyari, ay taganán kasalanan lay na no kaēn lay habayto. <sup>15</sup> A kitamo ampan-lugud no angkaēn tamo ha arapan hēn patēl tamo ha Panginoon ya muwang tamoy bawal kana, ta no matukso yan mangan etaman, ay habaytoy makahakit hēn nakēm na. Hiya man ay patēl tamo ha Panginoon ya inligtas gawan ha kamatsan ni Apo Jesu-Cristo, kabay paan tamon kaēn ya pangubatan pamigtan hēn hinoman ha impiyerno. <sup>16</sup> Agyan alwa bawal kantamoy habaytoy pamangan, ay paan tamon kaēn, ta êmēn ayn makapaghabi ya nanyag kitamon karawakan. <sup>17</sup> Ta ya maalagá ha pamanlokop ni Apo Namalyari, ay alwan pamangan o inêmēn, noa, ya pamag-in mahonol kana, haka ya pamikakasundo, haka ya kahiglaan gawan ha kapangyarihan nan Espiritu ni Apo Namalyari. <sup>18</sup> No êmbayro ya pamimiyay tamo ha pamaghuyo kan Apo Jesu-Cristo, ay ikahigla kitamo ni Apo Namalyari, haka galangēn la kitamo hēn kapareho tamo.

<sup>19</sup> Kabay pakikwanan tamon daygēn ya pangubatan hēn pamikakasundo, haka ya makapataniêh hēn paniwala hēn balang miha. <sup>20</sup> Paan

tamon hiraêñ ya paniwala kan Apo Namalyari ya indin na ha patêl tamo ha Panginoon, gawan bat ha pamangan. Agyan alwan bawal kantamo ya hinon pamangan, ay paan tamon kaêñ ya pangubatan hêñ pamanyag kasalanan hêñ kaatag. <sup>21</sup> Paan kitamon mangna hêñ kêña, o minêm alak, o manyag hêñ hinoman ya pangubatan hêñ mag-in kasalanan hêñ patêl tamo ha Panginoon. <sup>22</sup> Paan tamon ipamwang ha kaatag ya paniwala tamo ya tungkol ha imbawal, haka a imbawal ni Apo Namalyari, ta hiya haka hikitamo bat ya dapat magmuwang hêñ habayto. Mahigla kitamo, no manyag kitamo hêñ alwan halanghang ha konsinsya tamo. <sup>23</sup> Noa, no ampag-alangan kitamo no bawal ya hinoman ya pamangan, ay paan kaêñ ya habayto, ta no kaêñ tamo ya, ay kasalanan ya habayto gawan halanghang ya ha muwang tamoy mangêd. Hinoman ya andaygêñ tamo ya halanghang ha muwang tamoy mangêd ay kasalanan.

## 15

*Dapat manyag hêñ ikahigla haka ikakangêd hêñ kapareho*

<sup>1</sup> Hikitamo ya nananiêh ya paniwala, ay pagtêêhan tamo hilay a pon nananiêh ya paniwala. Paan kitamon manyag bêngat hêñ ikahigla haka ikakangêd tamo. <sup>2</sup> Ya balang miha ay dapat manyag hêñ ikahigla haka ikakangêd hêñ kapareho tamo. Dapat tamon daygêñ ya habayto ta êmên tumaniêh ya paniwala la. <sup>3</sup> Hi Apo Jesu-Cristo man, ay a na dinyag ya ikahigla hêñ sarili na. Minusmus la ya man, ay dinyag

nay ikahigla ni Apo Namalyari. Ta nanad hiyay main habi di ha Kahulatan, “Ha pammusmus la kamo, ay hiko ya minusmus la.”\* <sup>4</sup> Paan yon liwaan ya kakwaan tamon aral, ya kaganawan impahulat ni Apo Namalyari ha Kahulatan hên hato, ta êmén ha pamagtêeh, haka kahiglaan nakêm ya ubat ha Kahulatan, ay maihundo tamoy pamangênggan tamo ha idigalo na kantamo. <sup>5</sup> Hi Apo Namalyari ya ampangubatan hên pamagtêeh haka pamahiglan nakêm. Dayi hawpan na kaw hên mamiyay hên main pamikakasundo ha pamanungtung yo ha pamimiyay ni Apo Jesu-Cristo, <sup>6</sup> ta êmén kaw milalamo hên magpuri kan Apo Namalyari, ya Tatang ni Panginoon tamon Jesu-Cristo.

*Ya ingalo ni Apo Namalyari kanlan alwan Israelita*

<sup>7</sup> No ay-êmén na kaw tinanggap ni Panginoon Jesu-Cristo, ay êmbayro êt ya pamananggap yo ha miha ta miha, ta êmén ya mapuri hi Apo Namalyari. <sup>8</sup> Hêñ haton lagi, ay nangako hi Apo Namalyari kanlan ninuno naêñ Israelita, ya mamiutoh yan Mámiligtas, ya Mesias. Ha pamanupad ni Apo Jesu-Cristo bayro ha impangako ni Apo Namalyari, ya mamiutoh yan Mámiligtas, ay namwangan naêñ ya pêtêg awud hên ampanupad hi Apo Namalyari hên pangako na. <sup>9</sup> Gawan êt bayro ha pamanupad ni Apo Jesu-Cristo, ay naipahlêk ni Apo Namalyari ya ingalo na kanlan alwan Israelita. Haka gawan bayro ha ingalo na, ay ampagpuri hilay na kana. Habaytoy nakatupad ha impahulat

---

\* **15:3** Awit 69:9.

ni Apo Namalyari kan Arin David hēn hato, ya wani Arin David,  
 “Purién kata hēn kalamo ko hilay alwan Israelita,  
 haka magkanta kon pamagpuri kamo!”†  
**10** Inungkat hila êt di ha impahulat ni Apo Namalyari, ya wanana hulat,  
 “Maghigla kaw, ya alwan Israelita hēn kalamo yo  
 hilay pinili ni Apo Namalyari!”‡  
**11** Nakahulat êt, ya wana,  
 “Hikaw ya alwan Israelita, purién yoy Panginoon!  
 Hikaw ya atsi ha kaganawan bansa, ay magpuri  
 kaw ngan kana!”§  
**12** Êmbayri êt ya impahulat ni Apo Namalyari kan Propeta Isaias, ya tungkol kan Apo Jesu-Cristo, ya wanana hulat,  
 “Lano, ay lumatêng ya mihay kaapo-apoan ni apo Jesse.  
 Hiyay iutoh ni Apo Namalyari hēn mamaala kanlan alwan Israelita.  
 Haka taganán muwang la, ya tuparêñ nay impan-gako na.”\*  
**13** An-ihalangin kataw ya pahiglaen na dayi ni Apo Namalyari ya nakêm yo, haka dyanan na kaw hēn kapatékbékan ihip gawan ha paniwala yo kana, ta êmén ha kapangyarihan hēn Espiritu na, ay mapahanan pon ya kasiguradoan yo, ya matanggap yoy impangako na.

*Ya panoro ni apostol Pablo kanlan alwan Israelita*

---

† **15:9** Awit 18:49. ‡ **15:10** Deuteronomio 32:43. § **15:11** Awit 117:1. \* **15:12** Isaias 11:10.

<sup>14</sup> Hikaw ya patêl ko ha Panginoon, angkasigurado ko ya panay mangêd ya andaygên yo. Usto ya angkaintindihan yoy kaptégan ya ubat kan Apo Namalyari, haka malyari yon toroan ya kapareho yo hên tungkol bayro. <sup>15</sup> Embayro man, ay di ha hulat ko ay indiretsa koy kaatag ya toro ko, ta êmén a yo maliwaan ya habayto. Diniretsa kataw, gawan ha indin kangkoy tungkulon ni Apo Namalyari, gawan ha ingalo na ya ayn kapantag, <sup>16</sup> ta êmén ko mapaghuyuan hi Apo Jesu-Cristo hên mamipamwang hên Mangangêd ya Habi ya ubat kan Apo Namalyari kanlan alwan Israelita. Hilay mag-in nanad in-átang kan Apo Namalyari ya an-ikahigla na, gawan dinyag hila hên Espiritu na hên banal. <sup>17</sup> Gawan ha pakikimiha ko kan Apo Jesu-Cristo, ay malyari kon ipagmahlay ya pamaghuyo ko kan Apo Namalyari. <sup>18</sup> Ayn akon kaatag ya maipagmahlay, no alwan ya dinyag ni Apo Jesu-Cristo, ta êmén mahagyat hilay alwan Israelita hên humonol kan Apo Namalyari gawan ha hinabi haka dinyag ko, <sup>19</sup> haka gawan ha makapangyarihan ya kapapaépapah ya nadyag, gawan ha kapangyarihan nan Espiritu ni Apo Namalyari. Kabay ha ay-irin logal ya pinanoroan ko, paubat ha balayan Jerusalem angga ha probinsyan Ilirico, ay impamwang kina ya Mangêd ya Habi tungkol kan Apo Jesu-Cristo. <sup>20</sup> Mimihan bat ya ampakapakikwanan ko. Yabay ya maipamwang ko ya Mangêd ya Habi kanlan a pon nakgilam hên tungkol kan Apo Jesu-Cristo, ta êmén a ko manoro kanlan tinoroan hên kaatag. <sup>21</sup> Ha panoro ko ay angkatupad ya habaytsi ya

impahulat ni Apo Namalyari ha Kahulatan,  
 “Hilay a pon nakagilam hēn tungkol kana, ay mak-agilam hēn tungkol kana,  
 haka makamulah hēn tungkol kana.”<sup>†</sup>

*Labay ni apostol Pablo hēn maniraw ha balayan Roma*

<sup>22</sup> Gawan habaytoy pamanoro ko ha hino-hinon logal, ay panay angkaabala ya pamaniraw ko bahēn. <sup>23</sup> Noa, amēhēn ta nayari ya pamanoro ko bayri, haka gawan nabuyot kinan labay-labay hēn maniraw kamoyu, <sup>24</sup> ay magdann ako bahēn kamoyu ha pammako ko ha bansen España. Panga-ubat kon nanugēl bahēn, ta napipapahigla kitamina, ay pahawop ako kamoyu ha pamanlumagay ko ha bansen España. <sup>25</sup> Noa, amēhēn, ay iatēl ko pon ya pera ya ihawop kanlan pinili ni Apo Namalyari hēn mag-in kana ha Jerusalem ya kapareho kon Israelita, <sup>26</sup> ta hilay patēl ha Panginoon ha probinsyan Macedonia haka Acaya ya alwan Israelita, ay nahiglan nami-tsipon hēn alay ya ihawop ha mangairap ya patēl ha Panginoon bayro ha Jerusalem. <sup>27</sup> Mahiglay nakēm lan nami-tsipon hēn alay gawan ha utang nakēm la kanlan patēl ha Panginoon ha Jerusalem. Gawan napakinabangnan lan alwan Israelita ya Mangēd ya Habi ya ubat kanlan kapareho kon Israelita, ay hépat ya pamanawop la. <sup>28</sup> Kabay no naiatēl kinay habaytoy pera, ay magdann kina bahēn kamoyu ha pamanlumagay ko ha España. <sup>29</sup> Haka muwang

---

<sup>†</sup> **15:21** Isaias 52:15.

ko ha pamaniraw ko bahêñ, ay taganán mapakin-abangnan tamo ya ayn kapantag ya ingalo ni Apo Jesu-Cristo.

<sup>30</sup> Patêl ko ha Panginoon, gawan kan Panginoon tamon Jesu-Cristo, haka gawan ha pamanlugud, ya an-indin kantamo hêñ Espiritu ni Apo Namalyari, ay ampakihabi ko kamoyu ya boon nakêm yo kon ihalangin, <sup>31</sup> ya illagan ako ni Apo Namalyari kanlan ayn paniwala kan Apo Jesu-Cristo ya atsi ha probinsyan Judea. Haka ipanalangin yo êt ya habaytsi ya pera ya anggêtan ko, ya dayi nakal-an hêñ tanggapêñ lan kapareho tamon pinili ni Apo Namalyari hêñ mag-in kana ha Jerusalem, <sup>32</sup> ta ha êmbayro, no kalabayan ni Apo Namalyari, ay mahigla ya pamanlumatêng ko bahêñ, haka mapahigla yo ko. <sup>33</sup> An-ihalangin kataw kan Apo Namalyari ya pinangubatan hêñ kapatêkbékan ihip, ya panay na kaw lamoan. Amen.

## 16

### *Pangumusta ni apostol Pablo*

<sup>1</sup> Di ha hulat ko, ay ipabalay ko kamoyu ya mihay babayi ya hi Febe, ya patêl tamo ha Panginoon ya ampanawop kanlan patêl ha Panginoon ya angkapi-tsi-tsipon ha balayan Cencrea. <sup>2</sup> Panlumatêng na bahêñ, ay dapat mahiglay nakêm yo yan tanggapêñ, ya hépat kantamon pinili ni Apo Namalyari hêñ mag-in kana. Dayi hawpan yo ya ha kaganawan kailangan na, ta hiya man ay mal-at ya nahawpan nay na, anggan hiko.

<sup>3</sup> Ikumusta yo ko kan Priscila haka Aquila, ya miahawa ya kapareho kon ampaghuyó kan Apo

Jesu-Cristo. <sup>4</sup> Nakal-an hilan matsu ta êmén la iligtas ya biyay ko ha kapapotog. Alwan bat hiko ya ampaghahalamat kanla, ta ampaghahalamat êt kanla ya hilay alwan Israelita, ya patêl ha Panginoon ya angkapi-tsi-tsipon ha ay-iri man ya logal. <sup>5</sup> Ikumusta yo ko êt kanlan patêl ha Panginoon ya angkapi-tsi-tsipon ha bali lan Priscila haka Aquila.

Ikumusta yo ko êt kan Epeneto ya anlugurên kon patêl ha Panginoon ya unan naniwala kan Apo Jesu-Cristo ha probinsyan Asia. <sup>6</sup> Ikumusta yo ko êt kan Maria ya mahipêg hên nagpagal hên nanaglap kamoyu. <sup>7</sup> Ikumusta yo ko êt kanlan Andronico haka Junia ya kapareho kon Israelita, ya nakalamo ko ha hukulan. Hilay taganán kilala lan apostol haka hilay nuna kangkon naniwala kan Apo Jesu-Cristo.

<sup>8</sup> Ikumusta yo ko êt kan Ampliato ya anlugurên ko ha Panginoon, <sup>9</sup> haka kan Urbano, ya kapareho kon ampaghuyu kan Apo Jesu-Cristo, haka kan Estaquis, ya anlugurên ko, <sup>10</sup> haka kan Apeles, ya namaptêg hên paniwala na kan Apo Jesu-Cristo, haka ha kalamo na ha bali ni Aristobulo. <sup>11</sup> Ikumusta yo ko êt kan Herodion ya kapareho kon Israelita. Ikumusta yo ko êt kanlan ampaniwala ha Panginoon ya atsi ha bali ni Narciso.

<sup>12</sup> Ikumusta yo ko êt kanlan Trifena haka Trifosa ya mahipêg hên tagahuyo hên Panginoon. Ikumusta yo ko êt kan Persida ya anlugurên kon patêl ya nagpagal ha pamaghuyu ha Panginoon. <sup>13</sup> Ikumusta yo ko êt kan Rufo, ya muwang gawan ha kahipêgan pamaghuyu na ha Panginoon. Iku-musta yo ko êt kanan indo ni Rufo ya nanad sarili

kon indo. <sup>14</sup> Ikumusta yo ko êt kanlan Asincrito, Flegonte, Hermes, Patrobas, Hermas haka kanlan patêl ya kalamo la. <sup>15</sup> Ikumusta yo ko êt kanlan Filologo, Julia, Nereo haka ha kapotoh pohêl na ya babayi, haka kan Olimpas haka kanlan kaganawan ya pinili ni Apo Namalyari hên mag-in kana, ya kalamo la.

<sup>16</sup> Mikukumusta kaw ta êmên ipahlêk ya pamalugud yo ha miha ta miha hên nanad patêl ha Panginoon. Angkumustaên kaw lan patêl ha Panginoon ya angkapi-tsi-tsipon ha ay-iri man ya logal.

### *Kaatag pon ya utoh*

<sup>17</sup> Hikaw ya patêl ha Panginoon, ampakihabi ko kamoyu ya kaillag kaw kanlan mapaniran pag-mimiha yo, ta ya toro la ay halanghang ha ustoy toro ya pinaniwal-an yoy na. Dayuán yo hila. <sup>18</sup> Ta hilay êmbayro ay ahê hên ampaghuyó kan Apo Jesu-Cristo ya Panginoon tamo, ta sarili lan kalabayan tana ya an-ihipêñ la. Gawan ha nanggaayang ya habi haka pamandayêw ay angkaloko hilay bat makihonol ha hinon habi. <sup>19</sup> Ya pamanhumonol yo kan Apo Jesu-Cristo ay angkabalitan ha ay-iri man ya logal. Kabay angkahigla ko kamoyu. Êmbayro man, ay labay ko ya mag-in kaw hên magaling ha pamanyag kangêran, haka linaw ha pamanyag karawakan. <sup>20</sup> A mabuyot, ay ipahambut na kamoyu hi Satanas ni Apo Namalyari ya ampam-in kapatêkbêkan ihip.

Ingalwan na kaw dayi ni Panginoon tamon Jesu-Cristo.

<sup>21</sup> Angkumustaên na kaw ni Timoteo, ya kalamo ko ha pamipamwang hên Mangangêd ya Habi. Angkumustaên na kaw lan kapareho kon Israelita ya hilan Lucio, Jason haka Sosipatro.

<sup>22</sup> Tercio ya pinamihulatan kon hata hulat ay ampangumusta êt kamoyu gawan hiyay kapareho tamon ampaniwala ha Panginoon.

<sup>23</sup> Angkumustaên na kaw ni Gayo ya kinatulyan ko. Di ha bali na ay angkapi-tsi-tsipon kay ya patêl ha Panginoon. Angkumustaên na kaw ni Erasto, ya ampamaala di ha pera hên balayan, haka ya patêl tamo hi Cuarto.

<sup>24</sup> [Dayi ingalwan na kaw ngan ni Panginoon Jesu-Cristo. Amen.]

### *Ya tawlin pamagpuri*

<sup>25</sup> Purién ya hi Apo Namalyari! Ampakataniêh yan paniwala yo gawan ha Mangêd ya Habi ya anitoro ko ya tungkol kan Apo Jesu-Cristo. Habaytoy a pon impamwang hên haton lagi, <sup>26</sup> noa, impamwang amêhêن gawan ha impahulat ni Apo Namalyari kanlan mâmipamwang hên impaihip na kanla hên hato ha Kahulatan. Hiya ya ayn umpisâ haka ayn angga, ay namiutoh kantamo hên ipamwang ya habayto ha balang logal, ta êmén main humonol hên maniwala kana ha balang bansa.

<sup>27</sup> Mimiha na ni Apo Namalyari ya magmuwang hên balang hino. Purién ya angga-angga gawan kan Apo Jesu-Cristo! Amen.

**Ya habi ni apo namalyari: Bayon tsipan - Ayta  
Mag-antsi  
New Testament in Ayta, Mag-antsi**

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

**Copyright Information**

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

**The New Testament**

in Ayta, Mag-antsi

**© 2006, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 22 Feb 2024 from source files  
dated 29 Jan 2022

d2289d90-e8af-5f04-a1e1-312fd0921aff